

程杏軒醫案

續錄



中國醫學大成第十一集

醫案類

程杏軒醫案續錄 二

上海大東書局印行

# 侯序

家弟端生。昔遊新安。適遭疴瘧。觀泉先生爲之蠲疴。歸述盛名。越數年。予始得見。豐頤藹度。信爲有道者。旣乃讀所刻古近體稿。多隱居冲澹。及壯遊奇麗之作。旣又讀所著醫案。益肅然於先生之爲通儒也。夫醫者意也。必有與天地同流之意。而後能誦古人方藥之書。又必一空膠窒方藥之言。而後能伸其用。當通神之意。醫果可以意爲。案果可以臆說哉。先生尙有未刻之書。曰醫述。蓋博覽靈素以後。歷代諸家之論。採其精當者。萃爲一集。卷帙盈尺。其精勤過於海錄。他日刊布。讀者參考互證。當益知通儒之所闡揚。不僅功侔良相也。

道光六年子月上澣白下侯雲松拜識

程古軒醫案續錄 侯序

# 朱序

內傳稱良醫者再。醫緩視晉侯疾。曰在盲之上。膏之下。攻之不可。達之不及。數語卽案也。又醫和視晉侯疾。曰是謂近女室。疾如蠱。非鬼非食。惑以喪志。後及六氣六淫。不節不時。并括內經運氣諸編。精義所言。亦案也。醫案如讞案。根源洞澈。治法精嚴。均繫乎此。顧非博物君子。深於醫理。未足語此。杏軒先生。於嘉慶九年。刊有醫案初集。隨證處方。靈心獨運。足度後學金針矣。嗣後所聞見益擴。所全活益衆。又彙記治驗若干條。定爲二集。出以示鍾。反覆讀之。彌歎先生之才大心細。師古而不泥於古也。虛實判之病。寒燥審之時。南北燥溼。因乎地。弱壯貧富。視乎人。批卻導窾。有指與物化。而不以心稽之妙。因亟請付梓。以善世。其初集藏版。不戒于火。今乃一竝補刊。以著雙玉爲珥。鍾蓋於道光丁亥冬日。訪道至巖鎮。親見先

生勤求醫奧。手不釋卷。積數十年博覽之功。年彌高而學彌篤。真所謂博物君子。深於醫理者也。吾願先生自今以往。日記所治。由周甲而晉期頤。靈丹救世無盡。而新編傳世亦無盡。三刻四刻。且鍾不揣褻昧。自訂續爲序言。以期附名於驥尾也。虹橋朱鍾謹序

# 吳序

曩余在都門。知鮑覺生侍讀。少違奇疾。賴程君杏軒獲全。越二十年。覺生視學中州。復病如前。杏軒又起之。心奇其人。以不得一見爲恨。嘉慶丁卯春。余攬疾南歸。遇杏軒於大梁使院。乞刀圭焉。十數年來。殆不知其疾之在體也。丁丑夏。余再至新安。杏軒亦倦遊歸。相見甚喜。晤語浹旬。盡出其所著書數種示余。上溯軒岐。旁及越人仲景。下逮河間東垣丹溪諸家。靡不究其精微。擴其旨趣。就中醫案續錄一編。說理精當。視前刻初集尤佳。余勸其付梓。杏軒讓未遑。余曰。子無然也。余見世所爲醫者多矣。讀湯頭歌括一冊。誦藥性賦一篇。遂榜於門曰醫室。號於人曰醫師。病者不察。從而求診。乞方焉。幸而得貲財。愈益肆其欺謾。乘堅車。策怒馬。馳騁以耀於衢人。尊信之者日益衆。殺人日益多。其不忍爲此態者。又或達心而懦。訥於言語。拙於文詞。爲世所輕。而醫理卒以不明於天下。今先生立盧扁之幟。入孫葛之壘。使是書不脛而走。風行海內。天下望而爭趨。登蒼生於仁壽。甚盛事也。縱山川修阻。鍼砭莫及。世醫即可奉爲準繩。以奏效於旦夕。其善養生者。得領緒

餘亦足以却病駐年。所全不已多乎。夫士君子之托業。國家之設官。皆爲養人計也。先生少業儒術。長習方書。常自恨不得用於世。以竟其學。余觀斯編所載。審是非於毫釐。察虛實於微渺。其良有司之矜慎。以折獄乎。補養以培元氣。和解使無鬱滯。其良有司之和煦。以愛民乎。法當攻伐。如厲鷹鷂。以逐烏雀。法當清涼。如沃淵泉。以救燎原。其良有司之鋤暴安良。不事姑息乎。吾願與先生同業者。皆以先生之學爲學。其不與先生同業者。皆以先生之心爲心。則郡邑之呻吟皆起矣。先生斯編。顧可祕而不宣乎哉。杏軒曰。唯唯。然猶藏之篋笥。自是又增入數十條。今年春。郵寄是書。問序於余。披閱之下。猶記曩在新安與吾杏軒晤言一室時也。爰進述之。以爲序。

道光四年歲次甲申季春月桐城吳賡枚

413.081

745

2210(5)



3 0466 5659 5

# 程杏軒醫案續錄目錄

- 黃敬修兄咳血……………一
- 鮑宗海風寒喘嗽誤補肺脹欲絕治驗……………二
- 胡某婦臟燥面論證治方法……………三
- 余振如兄幼子胎癩……………四
- 柳聖依翁夫人熱病戰汗而解……………五
- 鮑子欽兄感風停食小恙粹變虛脫宜用急療之法……………六
- 族婦眩暈續堂弟媳所患證同治皆無效不藥自痊……………七
- 洪荔原翁挾虛傷寒……………八
- 洪召亭翁夫人胎動血暈急救保全……………九
- 曹引泉翁竹筒痢……………一〇
- 王策勳先生幼孫疳疾……………一一
- 金蔭陶封翁久瀉滑脫之證……………一二

- 洪梅渚翁肝鬱犯胃痛嘔發黃溫補藥誤危而復安……………一三
- 又乃愛暑邪擾胃發熱吐瀉欲作驚搐……………一五
- 又乃耶溼溫感證……………一六
- 張汝功兄乃耶嗽久傷陰奇治驗……………一七
- 又令愛暑入心包拯治無功後見數人證同皆不可救并答門人  
四問……………一八
- 葉蔚如兄脅痛便閉一劑而效……………二五
- 曹靜川翁孫女頰脫音啞……………二六
- 堂妹吐證……………二七
- 方萃巖翁乃耶跌後又患腹痛藥傷胃氣治驗……………二八
- 又翁自患陰疽復中寒陽脫救急治法……………二九
- 次兒光墀單腹脹奇驗……………三〇
- 巴聲茂生佈痘癰閉險逆一劑救轉……………三二
- 答鮑北山翁詢伊耶飲澣證治始末并商善後之策……………三四

- 許玉書翁大郎腹痛吐瀉危證拯治之奇……………三八
- 又次郎脾腎陽虛伏寒凝沍重用溫補而瘳……………四〇
- 鮑宅京翁僕人中寒暴脫救轉之奇……………四一
- 許綱之兄齒痛……………四三
- 鮑智原翁令孫痘後鬼腫潰久藥投溫補而愈……………四三
- 吳尚時兄春溫兩感危證治愈附載鄭晉康兄令弟病同致殂之  
故并誨門人……………四四
- 家芄生兄怔忡治法……………四八
- 汪靖臣兄乃郎冒暑瀉甚欲脫亟挽元氣一法……………四九
- 又幼女外感咳嗽誤藥釀成肺痺急證……………五〇
- 黃曙堂翁乃郎頭痛忽變癩厥續見數證皆不治……………五一
- 家秀翹兄肝鬱痛傷胃氣詳論病機治法……………五二
- 別駕菽田何公僕婦子痢……………五四
- 鮑覺生宮詹病發二次不能復起……………五五

- 黃就唐表兄腕痛嘔吐危證治驗……………五六
- 燕雲亭司馬伏暑感證……………五七
- 饒君揚翁公郎風溫證治原委……………五八
- 饒厚卿兄幼女因熱生風之證治愈并明其理……………六〇
- 又僕人肝風用藥大意……………六一
- 許兌巖兄尊堂久痢治驗……………六一
- 許月隣翁令愛齒衄……………六三
- 族弟羲案血湧欲脫……………六三
- 何少君令政傳尸蟲異附載歷見諸證并詳治法……………六四
- 汪紹由翁尊堂脫證救甦……………六七
- 汪商彝翁夫人風寒襲絡之證……………六八
- 予久患腹痛忽下瘀血而痊……………六九

# 程杏軒醫案續錄

新安 杏軒程文囿觀泉甫

山陰 安波陳光壽

鄞縣 曹赤電炳章圈點

## 黃敬修兄咳血

敬兄向在金華貿易。恙患咳血。醫治無效。食微肌瘦。慮成損怯。予時至蘭谿。友人薦延診視。閱前諸方。偏於溫補。謂曰。古人治血證。雖有此法。然須審其證屬虛寒。方爲合轍。據茲脈證。責諸肺腎陰虧。肝陽上僭。咳甚火炎。血隨溢出。理應滋水生木。潤肺保金。得以咳稀。血當自止。服藥投機。予欲辭回。敬兄固留。爲治月餘。咳血全好。餐加神旺。肌肉復生。

安波按。溫熱治虛損與艸菅人命何異。故前賢云。男子陽常有餘。陰常不足。蓋男子氣恆有餘者多。血患不足者不少。以溫熱治虛損者。仲聖建中之類也。其



內以稼穡作甘之本味。急建其中氣。俾中宮得強。飲食增而津液旺。以至充血生精。而復其真陰之不足。愚意以治脾虛損怯則可。若腎陰耗乏。相火爆金。見咳。喘累血。形銷骨折。遺洩潮熱等疴。投之如抱薪救火矣。

鮑宗海風寒喘嗽誤補肺脹欲絕治驗

黃敬修兄店內。有同事鮑宗海者。因感風寒。喘嗽多日。就彼地某姓老醫看視。謂其證屬內傷。藥與地歸參朮。予見方勸其勿服。宗海以爲伊體素虛。老醫見識不謬。潛服其藥。是夜喘嗽益甚。次日復往加減。醫謂前藥尙輕。更增黃耆五味子。服後胸高氣築。莫能臥下。呻呀不休。閉悶欲絕。敬兄詢知其故。囑予拯治。予曰。前藥吾原勸其勿服。伊不之信。况加酸斂。邪錮益堅。如何排解。敬兄云。渠與我同事多年。不忍見其死而不救。揣摩至再。立方用麻黃桂枝細辛半夏甘草生薑杏仁葶藶子。并語之曰。此乃風寒客肺。氣阻痰凝。因而喘嗽。醫不開解。反投斂補。以致閉者愈閉。壅者愈壅。釀成肺脹危證。金匱云。咳逆倚息不得臥。小青龍湯主之。予於方中除五味白芍之酸收。加葶藶杏仁之苦瀉者。蓋肺苦氣上逆。急食苦以瀉之。

如救薪燃。不容緩待也。敬兄欣以爲然。卽令市藥煎服。少頃嗽出稠痰兩盃。胸膈頓寬。再服復渣。又吐痰涎盡許。喘定能臥。宗海始悟前藥之誤。泣求救援。予笑曰。無妨。枉自喫幾日苦耳。次劑麻桂等味分兩減輕。參入桔梗橘紅茯苓蘇子。更爲調和脾胃而痊。

安波按。風寒咳嗽。亦一大症也。不可渺視爲輕淺者。徐氏靈胎。苦志三十年。始能治咳。先生於小青龍。去味芍加葶杏。真善法。古人而不泥古人者也。

### 胡某婦臟燥面赤証治方法

長林胡某。延診婦病。據述證經半載。外無寒熱。飲食月事如常。惟時時悲泣。勸之不止。詢其何故。伊不自知。延醫多人。有云抑鬱。用逍遙散者。有云痰火。用溫膽湯者。藥俱不效。又疑邪祟。禳禱無靈。咸稱怪證。懇爲診治。視畢出語某曰。易治耳。立方藥用甘草小麥大棗。某問病名及用藥方法。予曰。病名臟燥。方乃甘麥大棗湯。詳載金匱玉函中。未見是書。不識病名。焉知治法。宜乎目爲怪證也。某曰。適承指教。足見高明。但拙荆病久。諸治無功。尊方藥只三味。且皆平淡。未卜果能去疾否。

予曰。此仲聖祖方。神化莫測。必效無疑。服之果驗。

安波按。有時法於古而不泥於古。有時竟法於古而泥於古。此之謂良工也。

### 余振如兄幼子胎癩

振兄乃郎。出胎兩月。突然肢搐目斜。踰時乃定。乳食如常。以爲偶然。次日又發。幼科作胎驚治。藥用疎風鎮驚不應。發經數日。俱在巳午時候。予視之。曰。此非胎驚。乃胎癩也。振兄云。胎驚則嘗聞之矣。胎癩之名。請問出於何典。予曰。名出內經。帝曰。人生而有癩疾者。病名曰何。安所得之。岐伯曰。名爲胎病。此得之在母腹中時。其母有所大驚。故令子發爲癩疾也。注云。癩癩也。夫驚之搐擲無定。癩之發作有時。大人之癩疾亦然。惟其發作有時。故較驚稍輕耳。爰用茯神遠志麥冬丹參甘草白芍菊花鉤藤桑寄生以安神定志。養肝熄風。少入橘紅半夏麩以滌擾心之痰涎。蓋疾由母腹受驚而得。病在心肝二臟。神安風熄。其疾自平。妄行疏散。則風益動。襍襟胃氣薄弱。金石鎮墜。尤非所宜。服藥其發漸輕。未幾而定。後見數兒證同。皆照此法治愈。

安波按。斯症邇來幼醫輒以抱龍等丸從事。徒不知孩提之負屈者。豈止恆河沙數乎。

### 柳聖依翁夫人熱病戰汗而解

聖翁夫人。夏間病患熱盛無汗。煩渴昏譫。醫治旬餘不解。聖翁外舅。伊郎蔭千兄。延予診視。脈數舌黃。謂曰。此熱病也。非清不可。疏竹葉石膏湯與之。時夜將半。聞叩扉聲甚急。啓視。蔭兄慌入而言曰。病危矣。詢其故。曰。妙劑當服。頭渣至暮未見動靜。再服復渣。更靜後。忽寒戰肢抖。少頃汗出如漿。膚冷息微。閉目不語。衆以爲殆。歸咎藥性太涼。欲投參附以救其脫。亟求復診以決之。予即隨往。捫其肌膚果冷。細按脈雖虛。然至數和緩。并不急疾。曰。無妨。此戰汗也。因本氣不足。邪氣鴟張。予重用清劑驅之。邪不能留。遂與正爭。是以戰而汗出。邪雖從此而解。正亦由此而虧。且任其養息。切勿驚擾。元氣來復。自然膚暖神甦。若驟進參附。誠恐餘燼復炎。反爲害矣。葉氏論溫熱病戰汗解後。胃氣空虛。有膚冷一晝夜之說。取書與閱。羣疑始釋。另立一方。用生脈散加茯神玉竹白芍甘草。囑市藥煎好。俟其蘇醒。

與服。并啜稀粥。以養胃氣。次早蔭兄來謝云。昨夕非子有定見。幾爲旁言所誤。遵囑靜守逾時。汗歛神甦。忙將煎好之藥服訖。復睡至曉。肌膚已溫。惟形倦氣怠耳。更爲輔正養陰和胃。漸次而康。

安彼按。斯證若脈急數。自汗如雨。躁煩不安。神志不寧。是自氣脫陽越之候。速宜大劑回陽。與此大相懸絕。

鮑子欽兄感風停食小恙猝變虛脫宜用急療之

法

子欽兄幼年質弱。偶因停感。發熱腹痛。兒科藥用荆防查曲。服後熱退痛止。以爲應驗。詎意次日臥床不起。頭垂目闔。氣怯懶言。不飲不食。急延予至。見其形狀倦怠。切脈細粟無神。維時伊舅柳蔭千兄在座。予告之曰。令甥之恙。乃元氣不支。切恐虛脫。亟宜峻補。遲則難救。蔭兄云。舍甥病纔兩日。消散又未過劑。童質固虛。何至遽脫。豈可驟投重補耶。予曰。小兒臟氣易爲虛實。脈證疲憊如斯。舍此別無他策。做補元煎方法與服二劑。病仍未轉。伊乃堂憂甚。予曰。凡治病補虛與攻實不

同。攻實可求速效。補虛本無近功。服藥病既不增。虛能受補。卽爲見效。古稱填補。如地有陷穽。方能容填。若平地填之。成敦阜矣。仍依原方加入耆朮。茯神。棗仁。合歸脾湯。守服。浹旬。頭豎目開。飲食照常。儼如無病。

安波按。於庚辰歲。治餘杭金姓。穉子。年甫五齡。形頗骯髒。忽患暴注下迫。形神頓減。小尿短滴。幼醫以消導之屬。靡不備嘗。或有以暴瀉屬熱者。需胡黃連之類。其瀉轉甚。延余診治。脈之細弱。乏神。按之則空。胎微黑。不渴。曰。寒邪直中。太陰所致。非附子理中湯不可。遲則恐變。乃尊曰。邪中太陰。已領教矣。然小兒體若純陽。胡可以熱濟之乎。余曰。醫貴活潑。不可執一說。以塞見聞。彼以爲然。投之果應。此症與斯案相類。險爲庸見所阻。故錄出爲固執者鑑。

族婦眩暈續堂弟媳所患證同。治皆無效。不藥自痊。

予童時見族中一婦人。頭額常繫一帶。行動須人扶掖。云無他病。惟頭目昏眩。飲食倍增。形體加胖。稍飢。心內卽覺難過。醫治無效。只得屏藥。越數年疾自愈。形體

退瘦。飲食起居如常。其致病之由。及所服方藥。均不可考。後堂弟媳年二旬餘。因遭同祿憂鬱成疾。見證與族婦彷彿。予知其疾由鬱而起。初投逍遙達鬱。繼加丹梔清火。更進地黃阿膠滋水生木。白芍菊花平肝熄風。磁石牡蠣鎮逆潛陽等法。俱不應。他醫以爲無痰不作眩。藥用豁痰。又以爲無虛不作眩。藥用補虛。亦皆無驗。遂不服藥。四旬外病自瘳。予生平所見眩暈之疾。未有甚於此二證者。且病中諸治不應。後皆不藥自痊。事亦奇矣。細求其故。蓋病關情志。是以草木無靈。由此觀之。凡七情內傷致病。皆可類推。

安波按。七情致病者。尼師寡婦室女爲尤甚。必須陶情怡悅。所謂心病必以心藥治也。

### 洪荔菀原翁挾虛傷寒

荔翁年踰強仕。冬月重感寒邪。診脈細緊。見證寒熱無汗。頭疼體痛。初投附子理陰煎。汗發不出。復診方加人參麻黃。翁曰。麻黃性悍。駛不能禦。吾質素弱。恐不可服。予笑謂曰。他人之麻黃或不可服。予之麻黃。放心服之。蓋醫當論方。不當論藥。

若以此加入表散藥中。則誠駛不能禦。今合補劑。有人參熟地監制之。雖勇過孟賁。亦難肆其強悍之性矣。古人用散法。有皮毛肌肉血脈筋骨之殊。峻散平散溫散涼散之異。至於陽根於陰。汗化於液。雲騰致雨之妙。獨景岳先生得之。其所製理陰煎。及麻桂飲。大溫中飲。數方。真可稱長沙之功臣。而補其所未備也。况理陰煎方後。原有加麻黃之法。又何疑耶。翁信予言。一服汗出而解。

安波按。於辛巳歲。治王少蓮者。夏月納涼痛飲。日晡覺頭重惡冷。至次日壯熱憎寒。口燥渴而不飲。目赤汗沾。診得診洪大而空。沉按若無。苔來黑滑。余曰。此腎陽爲陰暑所迫。致見陽氣上戴。目赤口燥不飲。脈空無神。壯熱惡寒。卽傷寒論之戴陽證也。擬附子理中湯加香薷人參一劑。而神清楚。寒熱頓減。口不燥。目赤退。諸恙稍愈。後以斯方減輕。加以祛暑滲濕而痊。似此案之相類。故亦錄出。以廣後來者之目。

### 洪召亭翁夫人胎動血暈急救保全

召翁夫人懷孕三月。胎動血崩發暈。促往診視。乃告翁曰。妊娠胎下血暈。已爲重

險。今胎未下而暈先見。倘胎下暈脫。奈何。翁囑立方。予曰。血脫益氣。舍獨參湯。別無良藥。翁問所需若干。予曰。數非一兩不可。翁出取參。予聞房內僱婦私語。胎產服參不宜。亟呼之出。語曰。爾何知。勿妄言以亂人意。少頃。翁持參至。予欲辭回。思適纔僱婦所言。恐病人聞之。疑而不服。豈不僨事。只得俟之。翁持參湯。予隨入房。病人果不肯服。翁無如何。予正色言曰。性命安危。在此一舉。今若不服此湯。胎下暈脫。莫救。俗見胎產忌服人參。無非恐其補住惡露。在胎下後。猶或可言。今胎未下。與平常臨產無異。豈平常臨產可以服參。今昏暈欲脫。反不可服乎。予治此證頗多。勿爲旁言所惑。病人疑釋。一飲而罄。予曰。有此砥柱中流。大勢可守。尙防胎下復暈。其參渣再煎。與服爲妙。詰朝復診。翁云。昨遵諭。仍將參渣煎服。薄暮胎下。惡露無多。暈亦未作。令多服培養氣血之劑而痊。續翁媳升治。兄令政半產。胎下血暈。時值寒冬。夤夜招診。兩脈已脫。面白肢冷。亟以參附湯灌甦。一家兩證。勢俱危險。皆仗參力保全。胎產不可服參。殊屬謬語。

安波按。半產之虛。虛不待言。况產前血暈等脫候。可不以參輔乎。險爲愚婦僨事。得以獲全者。亦幸耳。

## 曹引泉翁竹筒痢

引翁年將花甲。秋季患痢。纏綿日久。清利過劑。肛如竹筒。直下無度。臥牀不起。診脈細濡。望色憔悴。知爲脾腎兩虧。元氣下奪。所幸尙能納穀。胃氣未敗。做胃鬪煎。調石脂餘糧末。與服兩日。其痢稍減。再加桑螵蛸。晚間參服四神丸。治療匝月始止。

安波按。痢者利也。不可以通利治痢之常藥。以醫老人久痢之不固。其法不一。醫師胸有成竹耳。

## 王策勳先生幼孫疳疾

予弟綺蘭。服賈廬江。戊辰冬。予自中州回。道經彼地。羈留信宿。有王策勳先生者。與予弟善。抱其幼孫。懇爲診治。視其體熱面黃。肢細腹大。髮焦目暗。頸起結核。予曰。此乃疳疾。疳者乾也。小兒腸胃柔脆。乳食失調。運化不及。停積發熱。熱久津乾。故名曰疳。又謂之丁奚哺露。丁奚者。言奚童枯瘠如丁。哺露者。言愈哺而骨愈露。

但是疾每多生蟲。蟲暨日滋。侵蝕臟腑。非尋常藥餌所能去病。古方有布袋丸。治此證多驗。藥用人參白朮茯苓使君子肉各一兩。蘆薈夜明沙蕪荑甘草各五錢。共爲末。蒸餅糊丸。每粒約重三錢。日用一丸。以夏布袋盛之。另切精豬肉二兩。同煮汁服。肉亦可食。如法製就。服完一料而愈。

安波按。布袋丸名亦奇。方亦奇。故治亦奇。沈姓幼童五齡者。余之內戚也。患腹膨形黑。善食作瀉。雖骨支牀已半載矣。余宗是丸服半料。沉疴霍然。蓋意布袋者。今人之胃。如物之袋。病久致疴。蟲蝕已空。故其胃必虛。津液必涸。賴以豬肉汁充養胃陰。而衆藥得以各司其司。同心共濟。以奏凱歌也。

金蔭陶封翁久瀉滑脫之證

封翁年逾古稀。恙患泄瀉。公郎邁倫兄善岐黃。屢進溫補脾腎諸藥。淹纏日久。瀉總不止。招予診視。謂邁兄曰。尊翁所患乃瀉久腸胃滑脫之候也。十劑云。補可去弱。瀉可去脫。瀉久元氣未有不虛。但補僅可益虛。未能固脫。仲景云。理中者。理中焦。此利在下焦。赤石脂禹餘糧丸主之。李先知云。下焦有病人難會。須用餘糧赤

石脂。况腸胃之空。非此不能填。腸垢已去。非此不能復其粘着之性。喻西昌治陳彥質。浦君藝瀉利。久而不愈。用此俱奏奇功。遂於原方內加入石脂餘糧。服之果效。

安波按。善師古人之法。

洪梅渚翁肝鬱犯胃痛嘔發黃溫補藥誤危而復

安

嘉慶辛未春。予患眩暈。不出戶者累月。友人張汝功兄來。言洪梅翁病劇。述其證狀。起初少腹痛。嘔吐。醫謂寒凝厥陰。投以煖肝煎。痛嘔益甚。又謂腎氣上衝。更用理陰煎。合六君子湯。每劑俱用人參。服之愈劇。腕痞畏食。晝夜呻吟。面目色黃。醫稱體虧病重。補之不應。慮其虛脫。舉室憂惶。復有指爲疽證。欲進茵陳蒿湯者。囑邀子診以決之。予辭以疾。汝兄強之。於是扶掖而往。診畢笑謂翁曰。病可無妨。但藥只須數文一劑。毋大費主人物料。方疏加味逍遙散。加鬱金陳皮穀芽蘭葉。乃弟並鋒翁曰。家兄年將花甲。病經多日。痛嘔不食。胃氣空虛。輕淡之品。恐不濟事。

予曰。此非虛證。藥不中病。致益劇耳。經云。諸痛屬肝。病由肝鬱不舒。氣機遏抑。少腹乃厥陰部位。因而致痛。肝氣上逆。衝胃爲嘔。溫補太過。木鬱則火鬱。諸逆衝上。皆屬於火。食不得入。是有火也。至于面目色黃。亦肝鬱之所使然。非疸證也。逍遙一方。治木鬱而諸鬱皆解。其說出趙氏醫貫。予輯載拙集醫述中。檢書與閱。翁以爲然。初服各證均減。服至四劑。不痛不嘔。黃色盡退。共服藥十二劑。眠食如常。是役也。翁病召診日。皆汝兄代邀。語予曰。翁前服參藥不應。自以爲殆。子藥如此之輕。見效如此之速。甚爲感佩。囑予致意。容當圖謝。予曰。醫者愈病。分所當然。惟自抱疾。爲人療病。行動蹣跚。殊可笑耳。翁有盛情。拙集輯成。藉代付梓。亦善果也。勝酬多矣。晤間。翁問尊集成乎。予曰。未也。翁曰。且俟脫稿。薄助劑劑。閱茲廿載。集成而翁已仙矣。集首閱書姓氏款中。謹登翁名。不忘其言。

安波按。治肝一法。不外辛散酸收甘緩。此古製逍遙散之妙也。但肝病已久。必盜母氣。故前賢有溫煖肝腎。乙癸同源之治。如腎陰偏傷。木火內燃。雖滋腎陰一法。以柔肝。然肝最礙補。必須病久。或腎家素有宿疾。方爲合符耳。第治肝以辛散酸收爲多。以滋補收納者。十中一二耳。

又乃愛暑邪擾胃發熱吐瀉欲作驚搐

梅翁令愛。年甫兩齡。仲夏時發熱吐瀉。渠宅同事方心樹兄知醫。作暑風食滯治。熱甚煩渴。吐瀉益頻。延予至。心兄述其病狀。并用藥大意。予視其兒。身熱肢冷。舌絳苔黃。煩擾不定。謂心兄曰。證屬暑邪擾胃。熱氣上衝。以故渴飲吐瀉。經云。諸逆衝上。皆屬於火。暴注下迫。皆屬於熱。但嬰兒質脆。暑邪酷烈。最易激動肝風。許宣治先生論暑風驚候。由吐瀉而後發搐者。謂之慢驚。治之不易。且吐甚於瀉。吐多胃傷。不能宣布津液。是以諸藥無驗。必得生機活潑。方轉靈軸。所製黃土稻花湯一方甚妙。予遇此證。每倣其法。治多應手。於是方疏黃土稻花沙參茯苓甘草半夏烏梅木瓜扁莢葉。因其熱甚。再加黃連。一劑而效。夏月小兒感受暑邪熱渴。吐瀉不利於香砂朮麴者。服此方而晏如。

安波按。細繹方義。暑邪犯胃爲嘔。以黃土稻花溫而不燥。香而不竄。安胃爲君。吐多傷液。以沙參茯苓甘草半夏。養而不膩。輔而不滯。使中宮得以運旋。則吐瀉不治而自愈矣。故主爲臣。蓋土氣衰微。致招客邪。則勝己之木來侮。可不待

言而知也。故以烏梅木瓜預以定木爲佐。而脾胃得以安。肝得以伏。而炎炎之暑邪未驅。故使以扁豆葉得金氣之最早。祛暑平木。良由斯乎。

又乃郎溼溫感證

梅翁幼郎。夏閒患感證。見其發熱口乾。舌苔白膩。知有伏邪。思膏梁稚子。提攜捧負。邪何由受。詢其乳媪。據云向係樓居。近緣天暑。移住地房。微氣甚重。病因此受。亦未可知。予曰是矣。蓋微溼之氣。從口鼻吸入。伏於膜原。醞釀爲熱。自裏達表。不比風寒客於皮毛。可以辛溫發散而治也。初用淡豉蘇梗鮮藿香秦艽廣皮桔梗。連翹甘草通草之屬。芳香解穢。辛涼透邪。服藥熱甚。煩渴。舌苔轉黃。方除蘇梗廣皮。加入黃芩黑梔赤苓澤瀉。熱渴不止。舌色欲焦。予素手戰。渠宅視恙。方俱心樹。兄代書。乃謂之曰。此證熱勢熾甚。非白虎湯不能去病。心兄云。據證應用此方。但白虎之名。俗多恐懼。或至明日。如病不減。再進如何。予曰。搔溺救焚。急不及待。今舌欲焦。邪熱燔灼。胃津已傷。倘到明日。舌若變黑。而成胃實。則非白虎所能任。再投承氣。豈不更駭聽聞。因將病原治法。細與渠宅說明。當用石膏一兩。知母一錢。

并加滑石蘆根。其餘梔芩等味。分兩均照前加重。次日復看。身熱較輕。舌焦亦潤。但病來勢暴。若驟鬆手。恐其餘燼復燃。仍守原方。再服一劑。轉用沙參玉竹麥冬丹皮石斛料。豆梨汁芝麻。養陰濡液而痊。

安波按。讀斯篇未終。不覺喟然長嘆。已三息矣。蓋古之名湯治疾。二翻三復者甚衆。今時地卑氣薄。藥未終劑。更醫已數四矣。故出類拔萃之輩。常立於人背之後。是殆所謂命也夫。

### 張汝功兄乃郎嗽久傷陰奇治驗

汝兄乃郎。年方韶齒。秋間咳嗽。入冬不止。初起。嗆嗽痰澁。氣急面紅。漸次潮熱。脈數。食減肌瘦。藥如瀉白散。止嗽散。清燥救肺湯。徧嘗無驗。汝兄慮成童怯。囑予籌治。令且停藥。每日用甜雪梨一枚。去皮渣。雄猪肉四兩。同切塊。清水煮湯。啜之。其肉與粳米稀粥同食。兒病日久。戒食葷油。復爲藥苦。得此可口。食而甘之。數日而效。痰旬而痊。汝兄稱謝。並問其故。予曰。斯證卽喻西昌所謂秋傷於燥。冬生咳嗽之候也。夫燥者濡之。其所以服諸清潤之劑而不應者。緣童質向虧。嗽久陰傷。凡

藥皆草木根莖。祇可濡其時邪之燥。未能滋其津液之乾耳。經云。陰之所生。本在五味。五穀爲養。五果爲助。五畜爲益。故用猪肉雪梨粳米。諸多濡液滋乾之品。氣味合而服之。以補精益氣。豈尋常方劑可同語耶。汝兄慨然曰。人知藥能療病。不知藥反增病。人知食肉病復。不知食肉病愈。今而後益信醫理淵深。不易知也。

安波按。讀斯案字字珠玉。可見醫貴圓通。徒執成方於胸中。亦復何益。

又令愛暑入心包拯治無功後見數人證同皆不可救并答門人四問

汝兄令愛。拜年在室。時屆季夏。薄暮忽覺微寒。夜發壯熱。頭痛嘔吐。次早迓予。其女出房就診。脈弦急數。舌苔白膩。謂汝兄曰。證屬時感暑風。來勢不輕。防其生變。方用葛根防風以祛風。香薷茯苓甘草半夏夏滑石扁莢葉以清暑。詰朝入房診視。脈證如故。舌苔轉黃。熱盛口渴。目定神呆。方除葛根防風半夏。加入連翹知母花粉鮮荷葉。四朝再視。病者扶坐榻上。昏昏不語。令其伸舌。勉伸半截。尖絳起刺。汝兄云。小女夜來熱熾。煩渴呻吟不安。黎明稍定。以爲病減。不意神更昏迷。肢漸厥。

冷。未識何故。予曰。此暑入心包。邪陷於裏。熱深厥深。肝風欲萌。勢屬危險。可延他醫酌之。汝兄堅囑拯治。思暑由上受。首先犯衛。漸傳入營。葉氏有清絡熱。必佐芳香。開裏竅。以清神識。用至寶丹一法。吾鄉苦無此藥。姑用生地。元參。銀花。麥冬。川連。犀角。鮮菖蒲。西瓜翠衣。令取荷露煎藥。翌日復召。病勢益劇。目闔肢掣。口噤牙咬。予曰。肝風已動。證成痙厥。不可爲矣。汝兄乞籌。以希萬一。揣諸病情。治法不過如此。奈服藥不應。無已。再想外法。令挑黃土攤地上。鋪荷葉。將病人抬置其上。另用紫雪牛黃蜜調塗舌。方加鉤藤。桑寄生。羚羊角。平肝熄風。至第六朝。汝兄來云。昨晚肢掣不作。口噤已開。似有生意。再煩視之。至見病人眼戴口張。痰聲漉漉。切脈如絲。予曰。此非掣定。乃元氣內奪。無力鼓動故也。脈證俱敗。危期速矣。延至七朝而歿。未幾。又見鮑莘菴翁令媳之證。

莘翁邀視媳病。云日前因熱貪涼。起初頭痛嘔惡。旋即怯風發熱。至今熱猶未退。似屬外感。煩爲解散。免致成瘧。導予入室。診際問其頭痛乎。病者不答。轉令使女詢之。亦復默然。予曰。殆證也。辭不治。莘翁云。小媳病纔兩日。其候不過發熱頭痛。何以言殆。予曰。害雖未形。其機已露。蓋此病因於冒暑。夫暑喜傷心。心者君主之

官神明出焉。頃問病原。蔑知應對。足徵邪犯心包。神明爲之紊亂。按心肝爲臟。臟者藏也。邪已入臟。斷難驅逐。且手足厥陰相表裏。肝風癩厥。蟬聯而至。預期一候。恐有風波。并將張汝兄令愛病狀告之。翁雖唯唯。然未深信。續延他醫療治。諸證蜂生。果至七朝而逝。始信予言不虛。後旬日又見許禮門翁令姪媳之證。

禮翁儒而通醫。因乃姪媳病見招。晤間予告以近視張鮑兩女病。均不治之故。翁感然云。舍姪媳病候。與此彷彿。奈何。予問病經幾日矣。曰五日。問其狀。曰身熱肢涼。昏迷瘦瘵。予曰。邪已入臟。不可救矣。其姑堅託診視。脈證俱殆。翁求舉方。予曰。適談前視張鮑兩女證。維時病人猶能行動。尙不可療。况如是乎。辭欲登輿。其僕乞診婦病。詢其何疾。云病起三朝。發熱不退。神漸昏冒。今早手足微掣。予曰。此亦暑入心包之候也。可不必往。翁強之。偕至其家。見婦昏臥於牀。熱盛息粗。面赤脣乾。舌伸不前。抉視色絳。苔黃。切脈弦數。辭不用藥。僕人跪懇。勉議清解暑邪芳香宣竅之劑。并囑用黃土荷葉墊臥。越日僕來言。主母已故。妻病服藥熱緩掣定。神識稍清。復爲加減。幸得獲痊。後暮年再見洪蕊春兄令媳之證。

蕊兄乃媳。長夏患病。四朝熱盛神昏。舌黃口渴。肢冷脈細。予診之曰。此暑邪內犯

心包。棘手之候。蕊兄囑治。勉商清暑滌邪。參以芳香開竅。并語之曰。服藥熱減。神蘇。庶可圖幸。若肝風一動。則難救矣。旁議予方過涼。另延他醫。以病者肢冷脈細。認爲陰寒。遂用薑附。置諸陽證不問。歎俗病家服藥。喜熱畏涼。膏粱殆甚。維時姻婭咸集。度其少年新婚。當從陰證治法。蕊兄自不知醫。因聽衆咻。信以爲是。友人方瑞徵。病者之表兄也。予視病時。渠亦在座。見後醫之方。與予相左。私叩所以。予曰。病屬暑邪入臟。熱極似寒。實非陰證。亟爲清解。猶恐不及。再投薑附。豈不火上添油乎。瑞兄云。家姑現在伊宅。吾往告之。勿服其藥如何。予曰。子固婆心。但予雖能決其服彼藥而必死。然未能料其服予藥而必生。續聞竟服彼藥。肝風大動。顛簸反張。憑空躍起數尺。爬床搔席。嚙舌齟齒。未至一候而亡。予所見數證。臨危俱動風抽掣。然不若此之劇。蓋由薑附燥烈。以剛與剛。益助其威耳。後十餘年。復見吳蔚揚兄令愛之證。

蔚兄令愛。適本里洪宅。卽星垣翁之乃媳也。年近二旬。形瘦質弱。星翁乃郎。向外貿易。因病遄歸。媳侍湯藥。憂勞交集。時值溽暑。偶作寒熱。次日熱發不退。頭痛嘔吐。逆予診之。擬屬暑風相搏。投以輕解之劑。詰朝脈證如故。神識欠慧。予謂星翁

曰。令媳病勢頗劇。刻防傳變。可速告知令親。切勿輕忽。原方佐以清熱辟邪。四朝再召。蔚兄在座。據言。昨夕熱盛煩躁。今晨人事更迷。予入房診畢。曰。邪已入臟。且晚肝風即至。病人體薄。且多憂勞。料難支撐。并將疇昔所見諸證向說。囑早延醫斟酌。蔚兄務求畫策。勉於昨劑中參入芳香開竅。以盡人工。五日黎明。星翁遣價來請。予辭不往。再四相邀。至見病者昏臥肢掣。喉中痰鳴。予曰。內閉外脫。蔑能爲力。他醫用藥。亦無效靈。越日而殂。

安波按。於壬午小春初二。治錢清場司秦積卿公祖。年將古稀。神采豐鑠。六旬餘得類中症。後以大補獲痊。今歲秋季。忽覺形寒怕熱。溺短便澁。素善飯膳。須豚蹄之屬。飢必以大碗燕窩。其餘茶食之類。常不輟于口。寒熱之際。啖食亦恐失餓。致見神采矇曠。口牽指搖。目閉溲遺。切脈沉伏。搥視舌苔。乾燥黃厚。余曰。此伏暑候也。年高怯弱。慎防內閉外脫之險。辭以不起。彼人固求立方。余勉擬芳香開竅。辛涼豁痰之劑。令伊速覓妙手評酌。醫亦吾藥彷彿。竟服彼方。次日復診。余視脈病仍然。令搜真西黃幾釐。調至寶丹抹塗舌上。倘得神定。搥回可望萬一。如是彌留者五日矣。渠竟獲得西黃幾釐。調至寶丹將塗。詎期舌初沾

樂而公竟仙逝矣。茲閱斯案。益奇先生之明決於一候之間。神乎神乎。門人問曰。暑入心包一證。古人略而不詳。近葉氏案載證治數條。似非不救之候。且六淫首重傷寒。其危莫如兩感。雖軒岐祇有死期。而無治法。然後賢謂用藥先後。發表攻裏。復推出可生之機。今讀先生所著暑入心包數案。咸辭不治。或拯無功。果斯候之危甚於兩感。而竟不可救耶。答曰。傷寒兩感固危。畢竟其邪表裏雙傳。猶或可據可療。暑邪變幻無常。彼暴中之激烈。扁鵲不及擺指而投咀。蓋緣心爲君主之官。心包乃其外郭。邪犯心包。至危至急。烏可同類而語乎。又問曰。暑入心包。危急之故。已聞命矣。然三因病候多端。豈無一二可與比類者乎。答曰。安得無之。小兒夏月冒暑發熱。陡然神昏肢搐。俗呼暑風急驚。其證彷彿。其原相同。洵可以稱比類也。但暑邪感觸。小兒卽作驚搐者多。大人卽入心包者少。小兒暑風急驚。十中可救七八。大人暑入心包。十中難拯一二。此中奧義。不可不明。蓋小兒質弱。臟氣未實。邪入易。故病多。大人體強。臟氣已實。邪入難。故病少。惟其入之易。則其出亦易。故治易。入之難。則其出亦難。故治難。卽此觀之。病情思過半矣。又問曰。夫子發蒙解惑。暢論病機。頓開茅塞。頑

鈍輩以爲古人治病。證分寒熱。藥析溫涼。今見數案。治法悉是清暑辟邪。參以芳香通竅。不識此外尙有他法。可施與。答曰。凡治他病證。有寒熱之殊。藥有溫涼之異。惟此一證。有熱無寒。比例溫病。病必有陽而無陰。藥必用寒而遠熱。夫暴病暴死。皆屬於火。若寒則凝。恆稽遲。焉有如此之激烈哉。予爲子輩再伸其義。醫方八法。汗吐下和溫清補瀉是也。此證邪已入臟。汗之不宜。腑病宜通。臟無下法。溫則以剛與剛。和解滲利。絕無干涉。痰食結胸。則吐之。臟邪從無吐出之理。至於補法。傷寒中風。邪陷于裏。往往用之。無如此證。邪入瀰漫。虛靈閉塞。不滌其邪。徒補無益。故舍清法。別無可施。譬諸救焚。舍水他無可用。再按小兒暑風驚證。質實能受清涼者。可治。質虛不受清涼者。不可治。此證亦然。曩治許禮門翁僕婦之證。得愈者。亦因其藜藿體堅。能受清涼故也。膏粱羸弱。患此欲求幸免者。幾希。又問曰。傷寒論云。太陽病頭痛。至七日以上自愈者。以行其經盡故也。若欲作再經者。鍼足陽明。使經不傳則愈。此仲師驗治傷寒傳經之法也。夫子言暑入心包之候。危於傷寒。但寒之傷人尙少。暑之傷人甚多。暑邪之入臟。如傷寒之傳經。應可預知。曷不做仲師鍼法。使其不入可乎。答曰。此未

可易言也。夫寒邪未傳之先。有證可據。暑邪未入之先。無證可憑。當其疾作之始。身熱頭疼。嘔吐口渴。與尋常暑證不殊。有此慧眼。能預知其邪之欲入。而爲設法堵禦耶。內經論卒中云。急虛身中卒至。譬如墮溺。不可爲期。可類推矣。雖然邪之未入。固難預知。而邪之既入。不可不識。凡診暑證。二三日間。視病者神識微呆。卽是邪入之徵。此語未經人道。舟子望雲而知風汛。予閱歷有年之一得耳。既知邪之已入。維時其入尙淺。肝風未萌。似可極力驅之。勿令入深可也。無如暑邪變幻。電掣雷奔。迅速異常。縱使驅逐。枉竭其力。罕見其功。亦非臨證目擊。不能知之。茲因子輩之問。一伸病機。惜未水飲上池。無浣腸滌胃之術。能起人於九死一生之中。徒自歉耳。

葉蔚如兄脅痛便閉一劑而效

蔚兄來診云。病初右脅刺痛。皮膚如烙。漸致大便閉結。坐臥不安。每便努掙。痛劇

難耐。理氣清火。養血潤腸。藥皆不應。切脈弦急欠柔。謂曰易治耳。一劑可愈。蔚兄云。吾病日久。諸藥無靈。何言易治。予曰。此乃燥證。肺苦燥。其脈行於右。與大腸相表裏。方書論脅痛以左屬肝。右屬肺。今痛在右脅而便閉結。肺病顯然。但肝雖位於左。而其脈繫於兩脅。內經言邪在肝。則兩脅中痛。今痛雖在右脅。不得謂其專屬肺病已也。夫金制木。憂傷肺。金失其剛。轉而為柔。致令木失其柔。轉而為剛。辛香益助其剛。苦寒愈資其燥。潤腸養血。緩不濟急。訂方用括蕁一枚。甘草二錢。紅花五分。蔚兄見方稱奇。乃詢所以。予曰。方出赤水元珠。夫括蕁柔而潤下。能治插脅之痛。合之甘草。緩中濡燥。稍入紅花。流通血脈。肝柔肺潤。效可必矣。服藥便通痛減。能以安臥。隨服復渣。微滄兩次。其痛如失。

安波按。懷抱奇。脅痛法。亦可參用。

曹靜川翁孫女頰脫音啞

靜翁孫女。年甫三齡。夏月發熱。醫作暑風治。投清散藥兩劑。忽頰脫音啞。食莫能嚼。飲莫能嚥。又以爲風中會厭。仍用散藥。靜翁遲疑。邀予商酌。謂曰。頰屬腎。頰脫

腎虛之徵。腎脈循喉嚨。挾舌本。爲聲音之根。經云。內奪而厥。則爲瘖痺。兒質本薄。暑復傷氣。更服辛散。元氣益漓。致變若此。倘再行疏泄。肝風一動。慢驚旋至。不可救矣。倣左歸飲合生脈散。服之而瘥。

安波按。勘此等證。腹中無內經。猶瞎子行路。

### 堂妹吐證

堂妹年二旬。因情懷憂鬱。致患吐證。每餐隔間哽哽。少頃卽吐。輕則只吐數口。甚則所食之物。傾囊而出。溫中調氣。清火解鬱。治俱不應。予用安胃制肝法。亦不驗。只得停藥。越十餘年。疾仍如故。肌肉不瘦。產育如常。予見此證數人。藥皆罔效。然亦無損。復有梅氏女一證。案載輯錄卷中。其候更加經期阻閉。纏綿數年。咸目爲殆。出室後得自愈。可見情志之病。藥餌難療。至於病久而血氣無損者。良由胃爲多氣多血之經。腑病較臟病輕耳。若果臟真損傷。焉能久延不壞乎。

安波按。古人云。師尼寡婦。必須異治。愚謂室女之治。較師尼寡婦爲尤甚。蓋室女人道未周。情竇早露。以致窒塞之鬱。百變百幻。結禱後。諸病霍然。余亦有見。

之者。馬陸氏女也。年過及笄。識書算。談吐淵博。知藥性。貌亦加常人一等。後得肝厥一症。每月如死者一二次。及合巹有時。而適逢厥來。從此好事多磨者有二次。余至。以疏肝息風爲事。然雖救目前之急。奈終身痼疾。總少妙術。忽忽三年。壅突至。完姻迄今。沉疴若失。而瓜戔已三四矣。

方萃巖翁乃郎跌後又患腹痛藥傷胃氣治驗

萃翁公郎葆晨兄。稟質素弱。曩患滑精。予爲治愈。案載初集中。斯病之始。偶因登山跌仆傷足。吾鄉專科接骨頗善。但其藥狠。弱者每不能勝。葆兄緣傷重。欲圖速效。日服其藥。已戕胃氣。又患腹痛。更服溫肝行氣活血等方。胃氣益傷。神疲倦臥。痛嘔不止。藥食不納。邀予診視。脈虛細澁。氣怯言微。面青自汗。謂萃翁曰。公郎病候。乃藥戕胃氣。恐蹈脫機。人以胃氣爲本。安穀則昌。治先救胃。冀其嘔止。穀安。然後以大補氣血之劑繼之。不徒愈病。且足得血而能步矣。但治嘔吐之藥。最宜詳辨氣味。不獨苦劣腥臊不能受。卽微郁微酸亦不能受。惟人參力大氣味和平。胃傷已極。非此莫可扶持。而單味獨用。分兩需多。購辦不易。姑以高麗參代之。日用

數錢。陳米水煎。緩緩呷之。守服數日。嘔止食納。神采略轉。接服大補元煎。漸可下床。移步尙苦。筋脈牽強。行動艱難。翁慮成跛。予曰。無憂。血氣未復耳。仍服前方。半載後步履如常。

安波按。味單則力峻。古人所以獨參名湯也。而其用專。

### 又翁自患陰疽復中寒陽脫救急治法

壬午冬萃翁患外證甚重。因往候之。翁臥於床。謂予曰。背偶生毒。已經旬矣。知子不專瘍科。故請潘日章兄看視。潰膿無多。并不痛楚。惟形疲食少。煩爲診之。切脈沉細而粟。觀其毒形平塌。乃告之曰。此疽也。其病在陰。治須溫補內托。由陰轉陽。掀腫作痛。毒化成膿。庶幾無慮。囑邀潘日章兄同議。方訂十全大補湯加白芷穿山甲。薄暮使來促云。刻病甚劇。祈速往。入室見翁靠坐於地。衆皆倉皇。予驚問故。乃弟子橋先生言。家兄因起身更衣。站立不住。忽然跌仆。遂作昏暈。故此不敢動移。按脈遲細欲伏。面青肢冷。嘔惡頻頻。予曰。此中寒也。病上加病。切防脫。變計惟參附湯以濟其急。嘔多胃逆。更以乾薑佐之。古有霹靂散之名。形其迅速也。適日兄

亦至。意見相符。於是用高麗參五錢。附子乾薑各二錢五分。令先扶掖上床。藥熟傾服。予與日兄同坐室中。俟其消息。時屆三鼓。漸見嘔定。肢溫。神蘇。脈出。予喜曰。可無憂矣。令煎二渣與服。次早復召。謂日兄曰。昨夕中寒急暴。幸賴參附湯挽回。今視其疽。形仍平塌。尚不知痛。昨同議之方。猶恐不濟。商以大劑養榮湯。加附子。再診。更增枸杞兔絲巴戟天及河車鹿茸血肉之屬。日漸知痛。腫起膿稠。腐化新生。治療月餘。瘡口始斂。

### 次兒光墀單腹脹奇驗

墀兒年踰弱冠。向無疾病。夏間偶患腹脹。以爲濕滯。無關緊要。雖服藥餌。然飲食起居。失於謹慎。糾纏兩月。腹形漸大。肌瘦食減。時作嘔吐。自療不愈。就同道曹肖巖。余朗亭二公診治。藥如和滲溫清消補。徧嘗無驗。其時尙能勉力出戶。猶不介意。予思既諸藥無功。諺云。不藥得中醫。遂令停藥。迨至冬初。因事觸怒。病益增劇。食入旋嘔。臥卽氣衝。二便欠利。予憶經云。肝主怒。怒則氣上。得無肝氣橫逆。阻胃之降。是以爲嘔爲脹。與自擬越鞠逍遙。及安胃制肝方法。亦不應。漸致腹大如鼓。

堅韌如石。筋綻臍突。骨立形羸。行步氣促。予技已窮。復邀同道諸公視之。皆稱證成中滿。消補兩難。有進專治鼓脹丸藥者。言其應如響。一下其腹即消。予料彼藥乃巴黃霸劫之品。今恙久胃虛。如何能受。即古治單脹。有用雞矢醴一方。顧斯畏食嘔吐。氣味亦不相投。晝夕躊躇。無策可畫。俄延至臘。忽覩梅梢蕊放。見景生情。旋摘數十枝。令以湯泡代茶。日啜數次。機關勒破。觸類旁通。家有藏釀。用木瓜橘餅各三錢。另以村膠煎熟。與藏釀對沖。晚飲兩盃。以前腹脹否塞。絕不響動。如此啜飲三日。腹中微鳴。不時失氣。堅韌稍軟。迨至旬餘。脹勢減半。二便覺爽。食入不嘔。夜能安臥。匝月後腹脹全消。當時脹甚。腹如拘攣。疑謂何物邪氣。若此之盛。及其脹消。大便并無穢惡遺出。可知即此身之元氣。與此身爲難首耳。兒病愈後。咸以爲奇。友人問予所用梅花治脹。出於何書。予曰。運用之妙。存乎一心。此予之會心偶中。無古可師。大概梅占先春花發最早。其氣芳香。故能舒肝醒脾。橘皮調和諸氣。肝以斂爲瀉。木瓜酸柔。能於土中瀉木。更藉酒力。是以前法療之於前。此醫之難也。然使此良工也。公郎之疾。固雖有術起之於後。尙且無法療之於前。此醫之難也。然使此證患於不明醫理之家。當其迫切之際。未有不隨下藥而斃者。此又醫之不可不

知也。予聆斯語。不覺悚然。

安波按。膨證一候。世乏良方。細繹此子得愈之由。緣年正方剛。血氣甚盛。雖病久形衰。而根蒂尙固。更兼年輕無知。鬱怒未深。並非寃沉海底。大怒不解。日就憂抑者。同日而語。不然。騰殘春回。木升當陽。其病日增之不暇。豈藉梅花微末之材。可能却病乎。余見是證。不治者甚衆。其年均在四五六左右。三十以外。尙未之聞也。余生也晚。不然。責之杏翁。以爲然乎否乎。

巴聲茂生佈痘癍閉險逆一劑救轉

巴生居近比隣。尊公秉昭翁。早子俱殤於痘。是春痘令盛行。兒多夭折。生年數齡。尙未出痘。翁以爲憂。一夕忽發熱嘔吐。臥寐不安。比曉迓予。望其頰赤脣乾。捫其身熱指冷。煩渴舌黃。細驗週身標點。隱隱夾有紫癍。顧謂翁曰。此佈痘癍閉。險逆之證也。服藥癍消痘透。庶可無虞。方定羌活散癍湯。加石膏燈心。午後復視。云服頭渣藥後。熱盛悶亂。頭搖肢掣。予曰。此欲作驚。令服復渣。薄暮煩熱益甚。昏譫渴飲。舌吐脣外。掉弄不休。痘仍不透。癍反增多。其勢頗劇。舉家倉皇。旁議劑中石膏

過涼。冰伏爲害。予辭焉。秉翁堅求拯治。因在隣居素契。且此子又從次兒受業。情難固却。復告之曰。方書雖有痘初宜於升發。忌用清涼。恐其冰伏之說。特此證。乃心冒火毒壅遏。致成癰閉。不清其火。癰何由消。痘何由透。前方清藥力輕。故不勝任。於是重用石膏爲君。佐以犀角酒炒黃連。元參升麻連翹赤芍牛蒡紫草之屬。燈心笏尖爲引。每服另沖無比散。取其大熱利小便。亦釜底抽薪之義。方已寫就。思舌爲心苗。今舌吐弄不休。內服煎藥。須外用紫雪塗之。奈此物吾鄉甚罕。乞諸其隣。所與些微。亦不濟事。翁云。吾有紫雪藏之久矣。取出稱有三錢。快甚。卽令蜜調塗舌。并速煎藥與服。次早翁來云。昨夕遵諭服藥。塗舌至半夜。熱緩癰收。渴止躁定。似有轉機。再煩一看。果諸證悉平。癰消痘透。予曰。生矣。詢其紫雪。只剩三分。餘皆塗去。予笑謂翁曰。此證雖仗藥力挽回。然非如許紫雪。亦無此速效。今火勢既平。藥當褪鬆。酌以十神解毒湯。仍稍用石膏犀角。清其餘火。轉用太乙保和湯。人參易沙參。加天蟲白芷貝母鮮鱗。漿成之後。補脾利水。清涼解毒。漸次收功。此等險證。幸在比隣。朝夕看視。藥隨病轉。得以保全。使病家與醫居隔遠。倉卒變幻。鞭長莫及。欲圖慶成。不亦難乎。

安波按。方議精妙入神。讀者不可忽過。

答鮑北山翁詢伊郎飲澹證治始末并商善後之

策

飲證名載內經。特經文專論。運氣司天在泉。勝復之義。僅啓大端。仲聖於金匱玉函中。闡發病機。詳辨治法。條分縷析。後世有所遵循。可稱幸甚。經云。水火者。陰陽之徵兆也。水爲陰。火爲陽。足見飲爲陰類。致病之由。必其人之元氣虧乏。陰盛陽衰。津液凝滯。不能輪布。留于胸中。則清者悉變爲濁矣。使果真氣充足。飲入于胃。游溢精氣。上輸于脾。脾氣散精。上歸于肺。通調水道。下輸膀胱。何患之有。經又云。陽化氣。陰成形。夫氣卽水也。水卽氣也。氣可化水。水可化氣。今則陰翳瀰漫。水精凝聚。得無陽衰。氣無以化之故乎。人身之陽有三。一曰膻中之陽。如離照當空。纖雲不掩。膻中陽虛。則濁陰上干。竊踞陽位。所謂濁氣在上。則生腹脹也。一曰腎中之陽。如釜底之火。熟腐水穀。腎中陽虛。則釜底無火。物終不熟。所謂戊癸少化。火之機。命陽無蒸燻之力也。一曰膀胱之陽。膀胱者。州都之官。津液藏焉。氣化則能

出。膻中位於膈內。膀胱位於腹內。膀胱氣化。則膻中之氣得以下行。膀胱陽虛。則氣不化。失其通調水道之職矣。童年既無色慾之戕。又鮮情志之擾。其膻中腎命膀胱之陽。從何而虧。飲病從何而起。得無水果生冷所傷之咎與。軒岐於病治之後。尚以穀肉果菜食養盡之。非謂水果不可食也。惟食之有節。無使過之。過則傷矣。童質稟薄。素嗜水果。胃陽受傷。致成飲癖。夫蔗性寒清胃。詩稱大官還有蔗漿寒者此也。舊夏日啖蔗漿。致發宿疾。胸膈支滿。漉漉有聲。憤然無奈。嘔吐冷水。成碗成盆。投以苓桂朮甘理中六君之屬。通陽滌飲。服至月餘。始得獲效。復訂溫健脾胃丸方。并囑戒食生冷。冀杜病根。仲秋病復召診。詢知丸藥未服。復食梨菱。此則自誤。非醫咎也。窺其病狀。較前加甚。不但嘔吐水冷。并且腕中喉口俱冷如冰。食薑不辣。洩色如柑。經云中氣不足。洩便爲變。諸病水液澄澈清冷。皆屬於寒。初則胃陽之傷。繼及膀胱腎命。一寒至此。誠爲可畏。薑椒桂附。屢投不應。思商硫黃丸。大熱純陽。差堪有濟。此藥吾鄉苦無市處。無已。每日方內附子加至五錢。連進十二劑。纔見春回暘谷。細揣此病。定有窠囊附於膈間。如賊寇依山傍險。結成巢穴。出沒不常。窠囊之說。許叔微論之於前。喻嘉言詳之於後。師古而非杜撰。前番

勢輕。病後只須治脾。此番勢重。病後務須治腎。因做腎氣丸方法。令其上緊製服。并囑水果不可沾唇。卽菜蔬性寒之品。均不可食。詎意旁人少所見。多所怪。因見方內附子分兩加重。咻爲有毒。不可多服。致令藥已奏功。反生疑畏。又將所立丸方。付未達不敢嘗之例。無如病雖暫愈。其根猶在。交春萌動。一夕吐水半桶。夫水之爲物。不盈科不行。積之日久。故復傾囊而出。不明窠囊之因。反詆溫藥之過。嗟吁。周禮冬至採毒藥以供醫事。凡攻疾之藥。俱是有毒。不獨附子爲然。但有病病當。彼性攻寒不逮。何暇留連作毒。如兵者。毒物也。然勦賊必須用之。若無故用兵。則受其毒矣。倘用兵以勦賊。勦賊以安民。則不惟不見其毒。而反受其益。故第論用之當不當。不必問其毒不毒。苟用之不當。卽無毒亦轉爲大毒。用之得當。卽有毒亦化爲無毒。仲聖傷寒方中。如四逆湯。回陽救急。生附俱用一枚。今時種附力薄。况經童便甘草製透。其力更緩。方將慮其無毒以攻疾。何至慮其有毒以傷人乎。試思一月之中。附子服過劬許。設不對證。早已禍起蕭牆。何以病後毫無喉痛口瘡之恙。安得視爲砒鴆。執迷不悟耶。果疑溫藥非是。盍請他醫療之。醫來案稱胃寒氣痛。藥用吳萸丁香。雜以枳朴蘆根石斛。僕因素契。不忍緘口。復實告以證。

屬寒凝。飲積且發。經數次吐多胃傷。豈特不可寒涼。卽枳朴消耗真氣。亦屬不合。此次病發。得以勢輕。未始非仗從前溫藥回陽之力。觀其吐後卽渴。金匱飲證條中。以渴者爲欲解也。愈期非遙。不藥亦可。但窠囊不除。終爲後患耳。如言停藥。數日卽安。論商善後之策。所云五沓朝元丹。僕前原思及此。惟是此番疾作。寒象旣已減輕。溫藥亦應稍損。純陽剛愎。似可無需。矧窠囊之疾。非迅速可以蕩掃。藥性過悍。久防增氣。且前僅用附子。衆咸詆其有毒。今若再進硫黃。更駭聽聞。莫若仍從外飲治脾。內飲治腎。不偏不倚。中正和平。禹之治水。行所無事。病去元氣不傷。斯爲盡善。再按治飲用溫。固屬無難。要知其病。雖由虛而成。非同全實。可以直行攻消。然亦非同全虛。可以專行溫補。酌於溫藥中。少加開導。俾飲邪不至逗留。合乎溫而和之之旨。考諸金匱云。心下有痰飲。胸脅支滿。目眩。苓桂朮甘湯主之。心下有支飲。小半夏加茯苓湯主之。原痰飲之作。不外脾胃陽虛。濁陰凝聚。而施治之法。亦不外燥土升陽。驅導飲邪。蓋胃寒則痰生。胃煖則痰消。脾溼則飲留。脾燥則飲去。二方雖治支飲。然用之於諸飲。亦無不行。并考許叔微本事方。專用蒼朮一味。療痰飲之癖囊。喻氏寓意草中。有華太夫人餌朮方法。效驗彰彰。聖域賢關。

心心相印。外飲治脾。當如是也。金匱又云。短氣有微飲。當從小便去之。苓桂朮甘湯主之。腎氣丸亦主之。蓋治飲雖以升陽燥土爲第一義。然從小便去之。尤爲先務。苓桂朮甘亦導水利小便之劑也。設其人腎陽不充。則難勝任。故又主之以腎氣丸。以桂附加入六味補腎藥中。益火之原。蒸暖中焦之陽。使胃利於消。而脾快於運。則飲邪自無伏留之患矣。况方內苓澤原有淡滲水邪之能。亦本溫而和之意。較他溫補諸方。相去逕庭。奈世無好桂。而種附力復淺薄。雖以枸兔佐之。猶恐不逮。再假斑龍血肉。純陽溫煦奇經。以補玉堂關下之闕。方內減丹皮者。恐其清瀉相火故也。內飲治腎。不亦宜乎。

安波按。可稱盡善盡美。

許玉書翁大郎腹痛吐瀉危證拯治之奇

玉翁大郎。童年曾患頭昏。諸藥不愈。予作肝風治。疏歸芍地黃湯。僉謂頭昏是有風寒。童子不可輕服熟地。翁排衆議。依方多服而瘳。次春又患腹痛。嘔吐便瀉。延診。藥用溫中調氣。兩服未愈。家人着急。令更他醫。日請數人。或以爲蟲。或以爲血。

或以爲火。治總不驗。淹纏旬餘。痛甚不止。嘔瀉不停。寢食俱廢。復邀診視。脈細面青。呻吟疲憊。予思病勢增劇。玉翁固雖相信。然旁議紛紛。難與着手。轉薦同道。余明亭先生診治。初投五苓散。續進真武湯。亦俱不應。玉翁堅囑想法。予曰。非不欲爲借籌。奈令郎病久。胃氣必空。輕劑諒不濟事。若背城借一。尊公愛孫如珍。見方駭然。焉肯與服。翁沉吟云。有一善策。今早友人談及隣村有扶鸞治病者。家人欲往求方。予呵止之。祈擬一方。予持語家人云。是乩仙所開。自必信服。予曰。策固善矣。治法尙難。令郎之病。起初不過寒凝氣滯。本無大害。因求速效。諸治龐雜。痛久傷氣。吐多傷胃。瀉多傷脾。致困頓若此。倘仍見病療病。必至土敗氣脫。計惟扶陽益氣。以拯其急。爰議附子理中湯。米水煎飲。氣固胃安。庶堪保守。詰朝玉翁來舍。喜云。曩服他藥。如水投石。昨服尊方。不但病減。并可啜粥。家人信爲神丹。相煩往視。懇爲加減。予曰。藥已對證。勿輕易輟。今日照方仍服一劑。明日再爲斟酌。次早往診。病勢大轉。因其體素陰虛。方內除去附子。又服兩日。更用參苓白朮散。調理而痊。是役也。非玉翁平素信心。兼施權變。安能圖成。誌此以見醫家臨證。不特病情之難窺。而人情之難處。尤甚也。

安波按。人情難處。近今爲尤甚。杏翁處嘉道盛世之際。而不見光緒醫生之吃苦乎。今日之醫。必須一劑知。二劑已之技。否則另商他人矣。可見人心不古。愈疏愈下。

又次郎脾腎陽虛伏寒凝沍重用溫補而瘳

玉翁次郎。形貌豐腴。向無疾病。丁亥季秋。望後。陡作寒熱。延予次兒光墀診治。藥投溫解。其熱卽退。嗣後單寒不熱。肢麻指涼。口吐冷涎。臍腹隱痛。便澹畏食。知係伏寒凝沍。方換薑附六君附子。初用八分。增至一錢。未見鬆動。邀予商酌。切脈遲細無力。望色面白舌潤。予曰。此正仲聖所謂無熱惡寒。發於陰也。前方不謬。尙恐病重藥輕。附子加用二錢。更加吳黃肉桂砂仁川椒。次日復診。病狀髣髴。思火爲土母。陽虛生寒。溫理脾陽不應。非補火生土不可。王冰所謂益火之原。以消陰翳也。倣生生子壯原湯。加吳茱萸胡盧巴肉果巴戟天。附子增至三錢。以爲必效矣。詰朝脈證依然。玉翁問故。予曰。無他。藥力未到耳。蓋市中種附力薄。凡經製透。其味更淡。可增四錢。再加鹿茸枸兔峻補真陽。自可春回暘谷。依法服之。證仍如舊。

翁姪召成兄私詢予曰。舍弟之病。先生審屬陰寒。第用如許熱藥。毫不見功。理殊不解。且附子大毒。今已服過數兩。久而增氣。可無患否。予曰。其他勿論。時下秋燥。此等純陽之藥。若不對證。一七亦不能堪。况其多乎。夫攻病之藥。皆有有毒。無毒之品。不能攻病。凡傷寒中陰等證。非附子不能驅除。同陽有病。則病受之。何有餘性。遺留作毒。即使有毒而生。不勝於無毒而死乎。仍守原方。附子加至五錢。維時旁議沸騰。幸玉翁信而不疑。予告之曰。此證確屬沉寒痼冷。然煎劑溫藥止矣。再得硫黃丸佐之。庶有裨益。於是煎丸并進。漸見好機。熱藥稍減。參入熟地。河車。杜仲。予與墀兒日爲診視。兩閱月始得全愈。共計服過附子一觔。硫黃丸二兩。乾薑六兩。鹿茸一架。黨參三觔。高麗人參共十餘兩。其他肉桂。吳黃。川椒等。不可勝計。予生平治陰證。用溫藥。未有若斯之多。而效驗亦無如此之遲也。

安波按。病家相信。醫家放膽。所以爲醫一道。非易事也。

### 鮑宅京翁僕人中寒暴脫救轉之奇

宅翁令政。質虧恙久。是歲季春病劇。延診。投以大補之劑。諸證漸減。六月初旬。病

人夜臥受涼。微覺怯寒。體痛。其時宅翁往淮。公即輝遠兄。遣僕相招。予至視畢。謂曰。此新感陰暑。但病軀不勝表散。暫進參附湯。得以邪從汗解。仍服本藥。比用人參二錢。附子錢半。各煎和就。正待與服。恰病人睡去。少頃輝兄出。告曰。家母方纔睡醒。身已有汗。體痛亦鬆。不甚怯寒。日內天暑。附子過溫。或可不用。即服本藥。何如。予曰。質虛偶感。邪原無多。標證既除。自應治本。仍將舊方加減配藥。其所和之參附湯。留貯盞內。置放几上。時值正午。輝兄留餐。甫將舉箸。忽僕人之婦。張皇奔入。泣云。伊夫病在垂危。叩求拯救。予曰。爾夫早間迓我。隨同歸來。并未見有病狀。婦云。陡然暈倒。不知所由。輝兄本家莆田翁偕往。果見神昏汗冷。肢厥脈伏。初爲躊躇。繼而猛省。笑顧莆翁曰。證固危殆。然有一大奇事。可望生機。翁驚問故。予曰。此證乃卒中陰寒。陽欲暴脫。而救脫必須人參。伊等焉能得此。充安危呼吸。急不可待。頃輝兄乃堂所煎之參附湯未服。人參雖貴重之物。但有附子在內。他人無此病。斷難服此藥。不意盛紀突遭斯疾。適與此藥脗合。豈非天造地設乎。令婦跟至輝兄宅中。予道其詳。衆咸稱異。當將几上參附藥盞付之持去。論其稍溫與服。再看動靜。下午其婦來云。服藥踰時。汗斂肢溫。人事漸甦。復診脈出神清。惟倦

怠耳。方疏參耆建中湯。仍加附子。囑向伊主人處乞高麗參四錢。分兩劑服。更見起色。續增枸杞山萸當歸杜仲。服之而瘳。觀此可見人之死生有數。而一飲一啄。莫非前定矣。

安波按。證似中暑。以參附回陽。非大識見不可。

### 許綱之兄齒痛

綱兄質虧多病。予爲調治。所用藥劑。不外歸脾湯。補元煎之屬。一日遣使相促。予至時將薄暮。綱兄踈臥榻上。起告予曰。早晨齒牙忽痛甚。不可耐。至今不止。恐挾風熱外因。故停前藥。相煩診視。暫解標邪。切脈沉細無力。見證形寒足冷。謂曰。此屬虛寒。非關外感。不徒用補。更須從溫。爰倣古方八味地黃湯。加骨碎補。一服痛已。

### 鮑智原翁令孫痘後鬼腫潰久藥投溫補而愈

智翁令孫三歲。痘後左手曲池穴側鬼腫。潰經年餘。外科療治。不能收口。逆予商

之。維時伊兄朗玉翁。及同事葉殿揚兄在座。二公俱知醫理。予視畢告曰。毒生手足。固不害命。然潰久膿水流多。氣血受傷。面黃肌瘦。神形疲倦。目無精采。天柱骨垂。一派大虛之象。最爲可慮。潰口收否。無暇計也。朗翁云。證旣屬虛。虛則當補。予曰。不但用補。且須用溫。智翁云。時下炎暑如蒸。過溫恐其難受。予曰。醫家治病。盛夏遇寒證。用熱藥。隆冬遇熱證。用涼藥。所謂舍時從證也。病若虛而不寒。單補亦可見功。今虛而兼寒。非溫補莫能奏效。爰定人參養營湯。加附子。鹿茸。枸杞。杜仲。合乎內經形不足者。溫之以氣。精不足者。補之以味之義。二公見方稱善。初服精神略轉。再服頸骨不傾。守服數十劑。氣血恢復。潰口亦斂。此證獲痊。雖予之執理不阿。亦賴二公贊襄之力也。

吳尙時兄春溫兩感危證。治愈附載。鄭晉康兄令弟病同致殂之故。并誨門人。

尙兄體素清癯。春月病溫。延診。金邁倫翁偕往。據述昨午先寒後熱。頭痛汗出。熱灼不退。口渴心煩。夜不安臥。形倦莫支。就榻診之。脈虛浮大而數。視舌無苔。撫如

乾版。予爲之駭曰。此證乃春溫兩感。至危至急。仲聖云。發熱而渴不惡寒者。爲溫病。發汗已身灼熱者。名曰風溫。內經云。冬傷於寒。春必病溫。冬不藏精。春必病溫。旣傷於寒。又不藏精。同時病發。謂之兩感。凡傷寒瘟疫。熱盛舌乾。亦須至一候之外始見。今病纔一日。舌卽乾涸。足徵腎水素虧。冬傷於寒。邪伏少陰。暗吸腎真。劫其家寶。故一見發熱。津液無以上供。舌卽乾矣。熱論篇云。傷寒一日。巨陽與少陰俱病。則頭痛口乾而煩滿。斷爲兩感。不可救藥。比類而推。殊難着手。爰用熟地一兩。當歸三錢。料豆五錢。玉竹五錢。甘草一錢。疏方訖。告邁翁曰。予生平治少陰。先瀆於裏。太陽復感於表。傷寒春溫兩感危殆之候。初起悉宗景岳新方。理陰托邪。往往獲效。無如此證。津液旣涸。再投薑附。則陰立亡。故但師其意。以廣期前輩風溫湯佐之。雖一時之權宜。亦經營之慘淡耳。邁翁曰。善。遂服其藥。熱減神安。舌稍轉潤。再加沙參麥冬女貞石斛。更進復脈。左歸漸次而愈。

安波按。形倦句不妥。蓋外感一病。人人皆倦。

鄭晉康兄。僑居濬口。設帳在宅。予因其居停延診。晤間云。舍弟抱恙。便託一看。予問恙經幾日矣。曰。昨日起病。發熱至今未退。予曰。此感證也。在宅去伊家不數武。

卽與偕行。途次談及時下患感證者頗多。須驗其舌。若初起舌苔膩厚。則受邪深重。纏綿難愈。旣至其室。病者出房就診。令其伸舌。乾涸無苔。形如鏡面。予曰殆矣。晉兄驚問所以。予曰適言感證輕重。須驗舌苔厚薄。不意令弟舌毫無苔。光明如鏡。初病見之。甚非佳兆。晉兄云。予言感證苔薄病輕。今舌無苔。反以爲殆。此曷故耶。因將曩視吳尙時兄病情向說。卽照所用治法。疏方付之。并告之曰。服藥應效則吉。否則難救。渠以予言爲過。另更他醫。日甚一日。揆至六朝。勢已沉篤。予言果驗。欲復相招。恐予不至。乃札託家苴生兄勸駕。予曰。非不肯往。奈彼病本重。卽服予藥。亦難必效。况復稽遲。內經論兩感之危。在於六日。今已屆期。盧扁再世。亦無能爲。苴兄曰。固雖如此。但渠昆仲與吾交契。今急而相求。且屈一行。以全吾之友誼耳。勉爲呼輿。將及門。其疾已革。

安波按。兩證舌俱無苔。外感固屬陰候。但亦須問其平日舌胎無苔否。倘若體質如是。不在此例也。

門人問曰。叔和序例云。寒毒藏於肌膚。思肌膚淺近。豈容邪棲數月。而病始發與。荅曰。喻氏云。寒邪由肌膚而入。辛苦之人。邪藏肌膚則有之。若膏粱之輩。冬

不藏精者。其寒邪且有藏於骨髓者矣。程扶生云。藏於肌膚。當云藏於骨髓。周禹載云。逆冬氣則少陰不藏。不藏寒邪得而入之。傷於肌膚。伏於骨髓。合三條而觀之。謂傷於肌膚則可。謂藏於肌膚則不可。又問曰。序例又云。至春變爲溫病。喻氏謂變字下得怪誕駭人。周禹載言變字大妙。未審孰是。答曰。內經論伏氣爲病。如冬傷於寒。春必病溫。春傷於風。夏生飧泄。夏傷於暑。秋必痰瘧。秋傷於溼。冬生咳嗽等條。未言變也。又如夏暑汗不出者。秋成風瘧。亦未言變也。其有稱變者。如高粱之變。足生大疔。逆春氣則少陽不生。肝氣內變。逆之則傷肝。夏爲寒變等條。乃謂病之由此變。彼如實證變虛。熱證變寒之類。始可言變。若春溫則本冬傷於寒。至春病作。流異源同。似未可言變也。經又云。秋傷於溼。上逆而咳。發爲痿厥。曷不一宗經旨。曰。至春發爲溫病。豈不躓乎。又問曰。經云。冬不藏精。春必病溫。然則室女童男。曠夫嫠婦。皆無溫病乎。答曰。經語渾融。在人之意會耳。蓋冬不藏精一語。亦指天時。非專指人事也。試觀天明則日月不明之句。義可見矣。夫一日之中。早明而夜晦者。卽藏精也。一歲之中。春生而冬藏者。亦藏精也。使入夜不晦。入冬不藏。人物能無夭札疵癘乎。軒岐於此分

定兩例。曰冬傷於寒。春必病溫。冬不藏精。春必病溫。但寒乃冬令之正氣。人知畏避。受病尙少。冬陽開泄。天暖而雷。乃爲淫氣。受病殊多。此雖予之臆說。然揆其理。似當不謬。又問曰。劉松峰謂內經冬傷於寒。春必病溫。雲笈七籤改作冬傷於汗。蓋言冬時過暖。以致汗出。來春必病溫。冬日嚴寒。來春并無瘟疫。以其應寒而寒。得時令之正故耳。以汗易寒可乎。答曰。此創論也。似亦近理。但內經格言。豈容率改耶。

家芑生兄怔忡治法

芑兄恙抱怔忡。久而不愈。每發心旌搖搖。頭暈神倦。輾轉不安。予診之曰。此煩勞鬱傷。心脾肝三經病也。方定黑歸脾湯。去木香。加白芍柴胡。合逍遙散。間參以麥冬五味柏子仁丹參牡蠣之屬。疾發雖輕。然猶未斷。芑兄憂之。予曰。神者伸也。人之神好伸而惡鬱。鬱則傷神。孔聖二論。首揭說樂。佛家般若經。首稱自在。莊生著南華。首標逍遙。遊情志中。病未可全憑藥力。務須屏煩頤養。方能除根。如言閒散半載。服煎藥兩百劑。至今疾不復發。

安波接鬱則傷神一句。妙極。蓋心有悒鬱。則事事肘掣。雖有樂境當前。變爲畏途。

### 汪靖臣兄乃郎冒暑瀉甚欲脫亟挽元氣一法

靖兄乃郎。年甫四齡。稟質向虧。夏冒暑邪。發熱便瀉。幼科僉用清散消導之品。服至匝旬。熱瀉如故。形疲氣餒。食入作嘔。醫稱邪滯未淨。仍用前藥。乃致食粥瀉粥。飲藥瀉藥。更醫以爲脾虛。投六君子湯。不應。始來逆予。兒臥几上。闔目無神。脈細如絲。予曰。胃氣告竭。慢驚欲來。不可爲矣。靖兄曰。固知病久屬虛。然昨服六君補藥。亦無靈效何也。予曰。病有倒懸之危。一縷千鈞。焉能有濟。考古人製六君子湯。原爲平時調養脾胃而設。非爲救急拯危而設也。且閱方內。并無人參。僅用錢許。黨參數分。白朮。而市中種朮。味苦性烈。與蒼朮等。不能補脾。而反燥脾。復有二陳。消之。茯苓利之。欲求撥亂反正之功。真蚍蜉之撼大樹矣。靖兄曰。然則治當如何。予曰。非真人參不可。蓋參者參也。與元氣爲參贊也。魚一刻無水即死。人一刻無氣即亡。兒質本薄。瀉久氣傷。加以醫藥重戕胃氣。經云。食入則胃實而腸虛。食下

則腸實而胃虛。今腸胃通爲一家。幽門闌門。洞開不固。飲食入胃。不使少留。卽從腸出。倉廩之官。廢弛厥職。此誠危急存亡之秋。惟仗參力。急固其氣。氣不奪則命不傾。然須獨用。始克見功。古有獨參湯可法也。靖兄聞言大悅。卽懇立方。專用人參二錢。令分兩次。米水煎服。熱退瀉稀。次日照方再進。便瀉全止。啜粥不嘔。更製八仙糕與服而痊。

又幼女外感咳嗽誤藥釀成肺痺急證

歛俗信神。無知之徒。將神廟籤詩。混編藥名。鄉愚患病。輒往求之。呼爲神藥。貽害甚多。靖兄外舅。幼女在襁褓中。時值冬寒。感冒外邪。發熱咳嗽。其妻誤聽人言。往求神籤。藥用貝母三錢。女流不諳藥性。卽市煎灌。咳嗽頓止。以爲神驗。少頃忽痰湧氣促。頭仰胸高。徹夜攪擾。次早迓予。視其兒身熱肢冷。口張鼻扇。啼聲如鴉。乃姑告其所以。予曰。此肺痺大證。危期甚速。夫肺主皮毛。皮毛受邪。肺氣閉塞。因而發熱咳嗽。不爲疏解。反投寒斂之品。且單味重用。爲害更烈。經云。風寒客於人。使人毫毛畢直。皮膚閉而爲熱。病入舍於肺。名曰肺痺。孩提弱質。焉能堪乎。辭不舉。

方。友人譚萃升翁。代懇試施一七。以圖僥倖。予思病既瀕危。藥非精銳。料難應效。方用麻黃桂枝杏仁桔梗橘紅半夏薑汁。并囑服藥豎抱。旋走。勿令臥倒。如此一晝夜。始得咳嗽出聲。痰喘略定。知其痺象稍寬。但病勢過重。藥雖見效。未便驟鬆。麻黃昨用三分。令其減半。餘照原制。再進一劑。汗出膚潤。熱退喘平。更用六安煎。加桔梗。臥穩嗽稀。予曰。痺開病去。大局無虞。古云小兒勿多服藥。蓋兒質薄弱。臟腑嬌嫩。藥多恐傷真氣。今可停藥。乳哺調之。自然恢復。果如予言。識此爲鄉愚信求神藥者戒。

安波按。神藥貽害。不可勝道。余見病傷寒服籤內人乳斃者兩人。可不戒哉。

黃曙堂翁乃郎頭痛忽變痙厥續見數證比自不治  
頭痛久而不愈。名曰頭風。頭風多害眼。方書固已言之矣。尙有一種突變。神迷肢掣。不可救治之證。前賢未經道及。曾見曙翁乃郎。年約十歲。頭痛時發。予因他事過其家。見兒號泣。詢之。翁告之故。出方藥皆辛散之屬。予曰。此由先天不足。木失水涵。風陽上冒。辛散不宜。翁求方。疏歸芍地黃湯付之。翁惑旁言。遂置不服。仍請

原醫看視。以爲前藥尙輕。更增細辛藁本。一夕痛劇而厥。手足痲痺。急來延予。予曰。肝風動矣。不可爲也。翁懇拯援。勉用熟地黨參冬阿膠炙甘草麻仁棗肉茯苓白芍。合復脈湯。參入牡蠣龜版。方諸水介潛之法。不驗辭之。更醫無功。遷延數日而歿。續見仇姓稚子及方氏女。證同皆不治。推詳病機。證屬頭痛巔疾。下虛上實。治當上病下取。醫昧病原。恣行辛散。以致變幻。其理顯然。凡諸痛厥可治者尙多。惟此證一經神迷。卽莫能救。此其故豈所謂甚則入腎內奪而厥。則爲瘖瘵者與。初集載有鄭氏婦一證。予雖爲治愈。然亦幸也。

安波按。肝風肝厥。髮逆以後。此風盛行。大抵感乎日久。人情矯柔。造作所致。何則。當髮逆熾張時。人且謀食療生之不暇。豈有怒髮冲冠之患乎。

### 家秀翹兄肝鬱痛傷胃氣詳論亡病機治法

秀兄年逾五旬。向在維揚貿易。患病數月。延醫多人。愈療愈劇。因買舟載歸。望其形容枯槁。行動艱難。診脈弦勁欠柔。詢其病原。據述舊冬少腹痛起。漸次痛連中脘。時作嘔惡。彼時納穀雖減。尙餐爛飯一盃。交春病勢日增。卽啜稀糜亦吐。形羸

肉脫。便秘皮枯。藥餌遍嘗。毫無一效。邇來更加惡聞藥氣。入口卽吐。君將何以教之。予曰。醫之審病。如吏之審案。審案必得其情。審病須明其理。推詳脈證。其病機已了然心目矣。按弦爲肝脈。諸痛屬肝。厥陰之脈。循少腹。究緣平日情懷不適。木鬱失條。少腹因而致痛。然肝爲將軍之官。臟剛性急。醫投辛香溫燥。希圖止痛。肝陰被劫。怒木益橫。衝胃爲嘔。此肝爲受病之源。胃爲傳病之所。醫多藥雜。胃氣益傷。夫胃爲水穀之海。氣血俱多之經。既不安穀。氣血從何生化。膚無血潤則枯槁。腸無血潤則乾燥。陽氣結於上。陰液衰於下。欲走噎途。豈區區草木所能回枯轉澤耶。經云。諸澁枯涸。乾勁皴揭。皆屬於燥。燥者濡之。治法固無難也。無如濡潤之品。恆多凝滯。現今胃氣空虛。嘔吐惡聞藥氣。焉能強進。考古人治血氣兩傷之候。先當益氣。氣爲血之帥也。但益氣藥品殊多。首推人參者。以其能回元氣於無何有之鄉也。再考東垣云。胃中虛熱。穀氣久虛。而爲嘔吐者。但得五穀之陰以和之。則嘔吐自止。不必用藥。謹擇參米飲一方。氣味冲和。諒當合轍。於是每日用人參二錢。陳米水煎。果受不吐。服至匝旬。餐加色轉。再合參乳湯。守服兩月。便濡膚澤而起。如此大證。只此二方。並未別參他味。藥簡功專。信矣。

安波按。病久屬虛。故人參能受。不然肝無補法之旨。竟置於無矣。

別駕菽田何公僕婦子癩

吾郡別駕何公。續遷甘肅。眷屬仍居郡城。宅中一僕婦。重身九月。偶患頭痛。醫作外感治。其痛益甚。嘔吐汗淋。至二鼓時。忽神迷肢掣。目吊口噤。乍作乍止。何公少君六吉兄。當晚遣力相召。曉造其宅。六兄告以病危之故。入視搖擗形狀。診脈虛弦勁急。謂曰。此子癩證也。勢雖危險。幸在初起。當不殞命。六兄曰。昨夕倉皇。恐駕到遲。故近邀女科一看。亦言證屬子癩。然服藥不效。奈何。出方閱之。羚羊角散也。予曰。此乃古方。原屬不謬。不知子癩疾作之由。因子在母腹。陰虛火熾。經脈空疏。精不養神。柔不養筋。而如厥如癩。神魂失守。手足抽掣。其病初頭痛者。卽內風欲動之徵也。醫家誤作外風。浪投疎散。致變若此。至羚羊角散。方內惟羚羊角入肝舒筋。當歸棗仁補肝益血。茯神安神。甘草緩急。與證相符。其餘防獨木香杏仁。俱耗真氣。苡仁下胎。多不合宜。豈可以爲古人成方。漫不加察耶。於是仍以本方除去防獨等味。參入熟地沙參麥冬阿膠芝麻。養陰濡液。少佐鉤藤桑寄生。平肝熄風。

頭煎服後。其搐漸平。隨服二煎。搐定頭痛亦減。六兄喜甚。予曰。病來勢暴。今雖暫熄。猶恐復萌。囑再市藥一劑。儘今晚服盡。搐不再作。方許無虞。次日復診。痛搐俱止。神清脈靜。納食不嘔。方除鉤藤寄生。加白芍玉竹女貞石斛。逾月分娩。母子俱得無恙。

安波按。論證一端。總在靈機活潑。隨症變化。不可效尾生之見。至死不悟也。

### 鮑覺生子宮詹疔病發二次不能復起

宮詹前於乾隆丁未冬。自毘陵抱疾歸。證類噎隔。已瀕於危。予爲治之而愈。嘉慶乙丑。宮詹視學中州。病發召診。又爲治愈。案載初集及輯錄中。道光乙酉秋。宮詹在都。前疾又作。初時尙輕。來書語狀。予輒憂之。慮其年逾花甲。血氣旣衰。非前此少壯可比。未又云。幸得請假南歸。便圖就診。深爲之喜。及至臘底。伊宅報中詳述病情。較前兩次發時更劇。體憊不支。勢甚危篤。令姪子碩兄。亟欲邀予入都診治。予雖老邁。誼不容辭。適迫歲暮。冰雪嚴凝。水陸舟車。都難進發。道阻且長。恐其病不及待。子碩兄躊躇無策。再四相商。只得酌擬一方。專足送去。冀幸得效如前。卽

可回籍調治。另函致意。勸令速歸。回書云。手翰再頌。感淪肌髓。妙劑服之。不似昔年之應手。蓋衰憊日久之故。欲歸不得。進退維谷。負我良友。何以爲人。弟之心緒。不可名狀。永別之感。慘割難言。然奄忽而徂。勝于癡狂而活也。專泐敬謝。不能多寫。亦不知結草何時。南望故鄉。惟有悵結。未幾遂卒。悲夫。官詹自訂年譜。未竟。令弟時任乾州。續成之。譜未有云。兄病中嘗語人曰。吾生平患此疾。及今而三矣。丁未乙丑。皆瀕於危。皆賴程杏軒治之而愈。今無杏軒。吾病殆不可爲矣。予閱及此。不禁泫然。

安波按。厥隔等症。較癱瘓尤險。大約倉扁復生。亦無如之何矣。

黃就唐表兄脘痛嘔吐危証治驗

就兄體素虛寒。向患腹痛。服溫藥相安。年來痛移上脘。氣逆嘔吐。飲食漸減。丁亥之秋。病發益劇。食全不納。自服理中六君之屬。溫理脾陽未應。形羸氣怯。臥床不起。遣价逆予。診脈胃少弦多。望色青白不澤。自以爲殆。予曰。無妨。治未中肯耳。尊體平素虛寒。原宜溫理。據茲脈證。由於心境欠舒。木鬱不達。厥陰干犯陽明。肝氣

逆橫。胃降失職。仲聖云。厥陰爲病。氣上衝心。心中熱疼。飢不欲食。夫肝爲將軍之官。臟剛性急。脾胃雖俱屬土。然須分別治之。不容僮統而論。葉香巖謂胃司受納。脾主運化。脾宜升則健。胃宜降則和。太陰溼土。得陽始運。陽明燥土。得陰自安。數語。實發前人之所未發。觀其食入卽嘔。足見其病在胃。而不在脾。理中六君。皆是脾藥。不能治胃。今胃空若谷。必須參力扶持。始克有濟。寒土購參不易。姑思其次。以高麗參代之。乃於六君子湯中。除朮甘之守。加入川椒烏梅乾薑木瓜白芍。另用陳倉米水煎服。藥則辛酸并投。法合制肝安胃。予辭歸。越日就兄專札來云。妙方連服兩劑。痛緩吐止。稍能安穀。頗見效靈。深爲感佩。尙祈加減。照原法略爲出入。守服而痊。次春相晤。郡城饒君揚翁宅中。丰采倍勝於前。

安波按。此亦病久胃虛。故麗參能受。然必須參入梅椒瓜等。做安胃腕。以辛散酸收甘緩三法並濟也。

燕雲亭司馬伏暑有感證

戊子夏。徽郡蛟水暴漲。橫流泛濫。田廬人畜。到處被湮。歛休尤甚。公奉委往勘。暑

溼煩蒸。感伏膜原。交秋疾作。始而寒熱似瘧。繼則單熱不寒。吾宗思敏翁爲治兩旬。大熱已退。日晡微潮。擬屬邪去正虧。轉爲養陰和胃。越日寒熱又作。以爲感復。輔正驅邪。病狀如故。神形益疲。度其恙久。陰陽兩虛。連投補劑。寒熱總不能止。囑邀予商。予進署時。公寒熱正發。臥榻呻吟。診畢思翁適至。謂予曰。燕公祖之恙。吾看多次。愈而反復。煩子酌之。予曰。頃診脈象數猶帶弦。熱時口猶作渴。是屬秋時晚發。感證似瘧之候。大局無妨。但恙久正氣固虛。餘波似仍未淨。過補恐其膩邪。過清慮其傷正。酌以輔正劑中。微寓和解之意。邪退而正不傷。斯爲美也。思翁稱善。遂令疏方。藥用首烏人參當歸茯苓甘草料豆衣扁豆殼陳皮半夏糯稻根鬚。引加鮮薑紅棗。另以井河水各半煎。露一宿。明早溫服。後旦再議。屆期復召。詢其家人云。昨服藥後。寒熱未來。夜眠安穩。入室公起坐就診。笑曰。瘧魔已被君驅去矣。復與思翁斟酌加減。不旬日而痊。公善畫山水。有倪迂風。惜墨如金。求之不得。病痊後。親繪一箋贈予。并序其事。

饒君揚翁公郎風溫證治原委

道光戊子冬。郡城饒君揚翁公。厚卿兄。病初起。寒熱頭痛咳嗽。服辛散藥一劑。次日單熱不寒。口渴煩躁。嗽痰帶血。下午突作昏暈。當晚折簡逆予。黎明至郡。見其面目俱赤。舌黃耳聾。嗆咳脅痛。汗出而熱不衰。診脈洪大數疾。謂君翁曰。公郎之恙。乃風溫犯肺。邪在上焦。速爲清解。免致蔓延。中下辛散之品。不宜用也。方用料豆甘草桑葉萹皮杏仁桔梗牛蒡子貝母梨皮之屬。詰朝復召。問知夜來熱甚煩譫。咳血甚多。望其面目仍赤。診畢昏暈。又作額汗淋漓。翁甚徬徨。適黃就唐表兄至。予告之曰。此證確屬風溫爲病。但質虧病重。慮難支撐。昨方力薄。故不應效。就兄曰。鄙見亦然。不識當如何用藥。予曰。噫。難言。考風溫名載仲景傷寒論中。但只言脈證及誤治之變。并未出方。叔和以下。亦皆無治法。惟朱奉議創立六方。可謂登壇樹幟。然旣言不可發汗。何萹蕤湯中。又用麻黃羌活等藥耶。宋元迄今。名賢代出。所論風溫證治。未有一言折衷。可爲法守者。惟近時休邑汪廣朝先生。所立風溫湯一方。只萹蕤料豆甘草三味。藥簡功專。頗有深意。予治此證。每宗此方。範圍而擴充之。往往獲驗。就兄以爲然。於是照方加入沙參生地丹皮地骨皮知母貝母黃芩。引用蘆根梨汁白蜜。服之大效。診視數次。熱勢漸退。苦寒漸減。轉手

養陰潤肺。調理兩月。幸得保全。是役也。使非君翁信而不疑。就兄推誠贊助。未見其有成功也。予常語人曰。凡起一大證。務須病家能篤信。醫者有主持。旁人不妄議。三者失一。不可爲矣。

饒厚卿兄幼女因熱生風之證治愈并明其理

厚兄病愈。其女三歲。發熱目赤。醫謂證屬因風生熱。投以羌活荊防。目腫如李。眇流如膿。熱甚搐搦。尊公君揚翁。囑予治之。予曰。此因熱生風證也。非清不可。方用生地丹皮山梔生甘草菊花桑葉石決明羚羊角。服之熱退搐定。目腫亦消。君翁疑而問曰。小孫女之病。醫云因風生熱。予云因熱生風。同一風耳。風則當散。何服散劑而病反增。服清劑而病旋愈。此曷故也。予曰。風熱二字。不可概言。須知內外標本之別。因風生熱者。乃外入之風。風勝則熱。遏散其風。而熱自解。所謂火鬱發之。此風爲本。熱爲標也。因熱生風者。乃內出之風。熱勝則風。旋清其熱。而風自熄。所謂熱者寒之。此熱爲本。風爲標也。醫家因風熱二字。義未解明。模稜施治。是以多誤。翁喟然曰。醫患不明理。理明則治病視諸掌矣。

安波按卓論也。

### 又僕人肝風用藥大意

君翁盛紀年將二旬。暮春之初。始覺頭筋抽痛。旋見口眼歪斜。肢涼脈細。以爲風寒外感。藥投溫散。其病益劇。肢掣頭昏。心悸汗漿。君翁令昇至舍。囑爲診治。按諸風眩掉。皆屬於肝。春深時強木長。水不涵木。陽化內風。乘虛繞絡。凡治風須分內外。外入之風則可散。內出之風散之益助其升騰鼓動之勢。現在左肢痠癢。防變痙厥神迷。議以滋水涵木。和陽熄風。方用炙甘草。黑參。熟地。麥冬。阿膠。芝麻。茯神。棗仁。五味子。牡蠣。小麥。南棗。初服四劑。勢已減輕。更加白芍。當歸。萎蕤。服至廿劑。病瘥。虛猶未復。令製丸藥。數閱月。始得元復如初。

### 許兌巖兄尊堂久痢治驗

兌兄尊堂年將及耄。本質陰虛。時常頭昏。口乾耳鳴。心悸。藥服滋補相安。秋初患痢。後成休息。延至次春。晝夜或十餘行。七八行之不等。每便腹痛後重。糞帶鮮紅。

間見白垢。形疲食少。醫治無效。召診脈如平時。予曰。體素陰虧。原宜滋養。但痢久。脾虛腸滑。滋藥又非所宜。方做異功散。加首烏。白芍。山藥。扁豆。蓮肉。老米。劑內俱用人參。數服。痢仍不止。復診告兌兄曰。令堂證屬休息痢疾。病根在大腸曲折之處。諸藥力不能到。卽服人參。亦皆無益。兌兄云。然則奈何。予曰。非鴉膽子莫能奏效。特此物本草未收。他書亦鮮論及。惟幼幼集成載其功能。名爲至聖丹。予用治此證。頗多獲驗。檢書與閱。兌兄云。據書所言。并先生經驗。自必不謬。第恐此藥性猛。家慈年邁。難勝耳。予曰。所慮固是。但每用只三十粒。去殼取仁。不過二三分。且有桂圓肉包裏。兼服補劑。扶持正氣。斷乎無傷。蓋非此莫達病所。病不能除。正反傷矣。如法製服。三日全瘳。是秋其疾復作。家黃洲兄爲治。多日未瘳。復邀同議。予曰。上春曾投鴉膽子見功。何不再用。兌兄仍以高年質虛爲憂。予曰。有病當之。不害。亦三服而愈。兌兄慮疾復萌。商用此味。研入調養丸藥內。冀刈病根。予曰。善後之圖。固妙。然研末入丸。似不合法。更與黃兄斟酌。仍照原製。每以五粒與丸藥和吞服之。兩月至今三年。其病不發。可見此藥之功效如神。

安波按。久年腸紅亦效。可見醫貴圓通也。

許月隣公翁令愛齒衄

月翁令愛患齒衄。藥服生地丹皮赤芍連翹石膏升麻之屬。衄反甚。予於方內除升麻加犀角。一服卽止。翁問曰。古人治血證用犀角地黃湯云。無犀角代以升麻。蓋升麻能引諸藥入陽明也。今服之不效。豈古方不足信與。予曰。朱二允有言。升麻性升。犀角性降。用犀角止血。乃借其下降之氣。清心肝之火。使血下行歸經耳。倘誤用升麻。血隨氣升。不愈湧出不止乎。古方未可盡泥也。翁又問入陽明清胃熱。藥品尙多。惟犀角與齒衄相宜者。得無齒屬上部。角長於頭。本乎天者親上之義耶。予曰。不寧惟是。人之上齒屬足陽明。禮云戴角者。無上齒。陽明之血脈。上貫於角。齒衄用之。輒應者。職是故也。

安波按。醫工古方而不知更變。猶一匠人拆舊料起翻房地基。雖合而鬪筭鉤角。總須刀鋸也。

族弟義案血湧欲脫

予僑居巖鎮。距祖居之東溪幾五十里。丁亥春。族弟義案證患吐血。近延予弟春圃門生詠堂酌治。血湧不止。勢欲暈脫。專价星夜逆予。至見病者仰靠於床。氣息奄奄。自云臍下熱氣上衝。血卽湧出。切脈虛大不斂。顧謂弟與生曰。此水火失濟之候也。經云水爲陰。火爲陽。夫人身之陰陽相抱而不脫。是以百年有常。故陽欲上脫。陰下吸之。不能脫也。今陽但上越。陰不下吸。恐蹈危機。所服皆滋納之品。藥病相當。其所以不驗者。病重藥輕故耳。方定大劑兩儀煎。合生脈散。更加龜版懷牛膝白芍茯苓山藥童便阿膠之屬。服後血雖不湧。脈猶未斂。予曰。慎之防復吐。上午因親屬問病。應答煩勞。血又上湧。神思飄蕩。幾欲脫去。忙照原方熟地由一兩增至二兩。再加磁石。吸引腎氣歸原。另煮團魚湯煎藥。蓋治真陽之飛越。不以龜鼈之類引之。下伏不能也。如言飲藥。血旋止。日晡又因家人嘈雜。血復溢出。雖不若前之甚。亦覺難支。思血屬陰喜靜。動則陽化。故越出上竅。令其閉戶屏煩。如此兩晝夜。始得脈斂神安。血止不吐。仍守前法調治。月餘而瘳。

安波按。方論並妙。

何少君令政傳尸蟲異附載歷見諸證并詳治法

何別駕少君六吉兄。召視令政病。診之曰。此瘵證也。危期甚速。可勿藥。憶別駕公如君。前亦患此疾而歿。因謂六兄曰。令政病狀。顯屬傳尸。此證五內有蟲。人將歿。蟲先出。迭相傳染。爲害最烈。慎防之。六兄曰。吾亦疑及此。據內子云。家庶母病篤時。伊坐榻旁。見帳中一物飛出。攢入伊鼻。自此得病。予曰。是矣。六兄求杜患之策。令斫癩肝末。每人日服錢許。思蟲由鼻入。當以法禦之。囑撚紙毬外裹雄黃。入病人房。以此塞鼻。倘見蟲出。卽鉗置火中煉之。一夕六兄入房。突有物飛集於頭。似覺蜿蜒多足。驚撥墮地而沒。秉燭四照。瞥見其物潛伏几下。蠢蠢然。急呼家人持鉗夾住。視形如蝶。翅翼生毛。毛色雜花。投諸火。啣啣如鼠聲。六兄有妹。時又病劇。越日令政逝。有隣媪來慰。順至伊妹房中問疾。歸家脫衣。陡見一蟲綴其裾。媪亦如法煉斃。伊妹殂後。患遂絕。

曩見方理豐翁宅中。始而妻死。於是繼而媳死。於是後弟媳又死。於是一歲之中。同病而死者三人。次春皆續絃。未幾長子死焉。翁娶繼室。質偉體堅。自以爲無患。不數月而病矣。其前妻之女。年已及笄。侍繼母湯藥。忽見病人鼻內有物。蠕蠕而出。心異之。其物飛撲女面。倏不見。繼室殂。女疾作。未百日亦殞。一歲之中。又同病。

而死者三人。傳尸之禍。可勝言哉。

又許玉生翁。有女四人。先是二三兩女。俱患此證。相繼而夭。居無何。四女又病。予謂之曰。此證有蟲傳染。三傳乃靈符藥莫制。宜設法以杜後患。翁因將長女遠送戚家。病女移於後院。家人日服獺肝。女歿。患幸泯。但三病臨危。俱未覩有蟲出。或能變化。而人莫之見與。

愚按。傳尸乃虛勞中另有一種。虛勞無蟲。傳尸有蟲。虛勞不傳染。傳尸傳染。但此病與虛勞形狀彷彿。卒難識認。而治之之法。諸說不同。務將證治辨明。則臨病庶有主持。亦醫家之不可不講也。請先以證言之。稽求古訓。如蘇游之說。道藏之言。不為不詳。然後人謂其類於不經。流於妄誕。似難取信。夫傳尸之異在於蟲。但其蟲須俟人之疾篤而後見。不比別病之蟲。可先從吐從便而見也。紫庭方用乳香熏病人手背。有毛出者。為傳尸。法雖未試。然恐不驗。又燒安息香煙。令病人吸之。嗽不止者。為傳尸。不嗽者非也。此說亦不足憑。凡虛勞多嗽。嗽最畏煙。斷無吸之不嗽之理。惟喻氏謂狐惑聲啞。勞瘵亦聲啞。是則聲啞者。氣管為蟲所蝕明矣。斯言可為此證之一驗。愚於此更有一得焉。如一家之

中。先有患虛勞而歿。未幾又一人所患證同。不問前病之見蟲有無。後病之聲啞與否。即可斷爲傳尸。蓋尋常虛勞不傳染也。至於治法。肘後有癩肝散。治冷勞鬼疰。一門相染。青囊有取蟲用啄木鳥法。喻氏又謂虛勞熱久。蒸其所瘀之血化而爲蟲。遂成傳尸。療證癩肝散。非不可以殺蟲。而未可以行血去瘀。仲景所製大黃蜜蟲丸。及授陳大夫之百勞丸。驅舊生新。誠有一無二之聖法。愚考二方。金匱原文。只言治五勞七傷。內有乾血。并未云治傳尸。喻氏從金匱敍虛勞於血痺之下。悟入。以爲血痺則瘀。瘀則生蟲。非具過人之識。不能若是。然則蜜蟲丸百勞丸。可滌蟲之原。癩肝散青囊藥。可除蟲之害。證有辨之之法。蟲有治之之方。傳尸之候。或有可生。然須及早圖之。若待其勢已成。噬臍何及。安波按。喻氏。瘀化爲蟲。實闡前人之秘。

### 江紹由翁尊堂脫證救甦

戊子之春。予由旌邑至孫村。汪生德輝家。伊族紹由翁尊堂病劇延診。比至。已治木矣。入見病者色白如鹽。切脈弦勁少胃。予曰。此脫證也。何以至此。翁述病原云。

家慈年近古稀。體虛多鬱。向患氣痛。服辛香之品稍快。舊夏病目。眼科療治。其目已盲。今春又因痰嗽。藥如二陳枳桔杏仁蘇子。服經多日。前夕忽心慌暈汗。至今不止。畏食懶言。出所服諸方。予閱之曰。病傷猶可治。藥傷最難醫。今脫機甚速。駟馬追之。尚恐不及。奈何。翁懇舉方。商以兩儀煎合生脈散。每劑擬用人參三錢。熟地八錢。翁云。家慈因患氣痛。補劑向不敢嘗。分兩過重。慮其不受。請小試之。如何。予曰。亦可。但大廈搖搖。一木恐難支耳。姑用人參一錢。熟地三錢。麥冬一錢五分。五味子五分。予下榻汪生宅中。次早翁即岷山兄來云。家祖母昨夕服妙藥後。安睡片時。汗斂暈定。略啜稀粥。稍能言語。幸已獲效。乞求復診。予曰。子歸先煎人參二錢。熟地五錢。備用。往察脈證。頗有起色。仍守原方。續做千金復脈湯。以救陰液。再加茯神歸芍牡蠣女貞石斛。柔肝養胃。漸次而痊。

汪商彝翁夫人風寒襲絡之證

商翁夫人。本質虛寒。常多疾病。舊春曾為診治。藥投溫補有效。今春因乃郎心疾。晝夜看守辛勞。風寒之邪。乘虛襲絡。比時不覺。漸致頸脊痠痛。喜煖畏寒。欲人揉

打糾纏兩月。醫用羌獨防風以驅風。香砂陳皮以理氣。屢服不應。季夏予至孫村。延診謂曰。此風寒襲絡之證也。夫初痛在經。久痛在絡。經主氣。絡主血。考督脈竝於脊裏。至風府入屬於腦。素問云。痛者寒氣多也。寒則泣而不流。溫則消而去之。大法治風先治血。血行風自滅。理當養血爲君。佐以溫通脈絡。非驅風理氣所能治也。方定當歸枸杞杜仲巴戟天附子鹿角膠霜狗脊五加皮秦艽桑枝四劑全愈。

安波按。此內風症也。名以風寒襲絡。似屬不切。不然前醫驅風已效靈矣。

### 予久患腹痛忽下瘀血而痊

予患腹痛多年。由午餐飯冷強食而起。痛處在臍之上。痛時腹冷。掌按熱熨稍瘥。雖盛夏亦必以帛護其腹。飲食漸減。喜煖畏涼。他物食尙相安。惟飯蒸煑未透。或稍冷食則必痛。素嗜瓜果。得疾後不敢嘗。向患痔紅。食薑蒜燒酒卽發。故忌之。此疾作時。食入阻滯。飲燒酒一二杯。反覺通暢。不但薑蒜不忌。卽食椒末辣醬均與痔紅無礙。經云。痛者寒氣多也。證屬寒凝氣滯無疑。予素畏藥。痛發無何。香砂薑

黃陳半穀芽神麩之類。服一兩劑即罷去。往歲發疎尙輕。惟餐飯不能如常。年來發頻且重。不拘何物。餐後必痛。須食下行。其痛方止。於是餐後不敢坐臥。乃學古人養生。食後行百步。常宜手摩腹之法。竝遵釋教過午戒食。然亦無益於病。遂視食爲畏途。無如疾經多載。消恐耗元。補防助壅。躊躇無策。友人謂予年近古稀。命陽衰弱。寒從内生。是以喜煖畏涼。釜底無火。物終不熟。是以穀食難化。須用八味丸補火生土。所論固是。予意終未坦然。思痛若在隔。慮其妨食成噎。今幸在腹。當不害命。藥餌亂投。恐反有傷。恪守不藥得中醫之誠。己丑季夏。旌邑孫村汪宅延診。下榻塾中。時二鼓既寢。急欲大便。燈滅暗中摸索。跌仆莫能掙扎。大孔汨汨遺出如瀉水狀。呼僕持火至。扶起視地皆污。色如漆。汗淋氣墜。卽忙就枕。汪宅獻楠志仁二公聞之馳至。殊爲着驚。予曰無妨。此因久痛蓄瘀。刻瘀下脫。未免傷氣耳。飲黨參桂圓湯。少頃氣稍續。汗亦斂。次早登廁。猶有餘瘀。予恐其瘀復脫。遣歸到家更衣。瘀已無矣。自此腹不再痛。餐飯如常。細求其故。究由瘀凝腸胃。阻其傳導之機。以故食入則痛。夫血猶水也。血之結而爲瘀。亦如水之結而爲冰。所以痛處常冷。按熨飲醇熱氣至。故覺稍快。至於瘀蓄年久。膠固已深。一旦傾囊自出。理殊

不解。得無長夏炎蒸。奔馳煩勞。動則陽化。如雪消而春水來耶。從斯悟入。書稱久痛在絡。絡主血。不獨肢體之痛爲在絡。卽胸腹之痛。痞積之痛。皆爲在絡。皆宜治血。無徒從事於氣。又如噎隔一證。方書雖有胃脘枯槁。及陽氣結於上。陰液衰於下等語。然由瘀血阻塞胃口者恆多。進而思之。予疾將十年。固未能自知瘀蓄於先。然不藥穩持。尙不失爲中駟。不然補瀉雜投。不殞於病。而殞於藥矣。予見敗壞之證。自萎者十之二三。藥傷者十之七八。藥本生人。而反殺人。可不懼哉。自今以往。伏願醫家證未審明。勿輕用藥。病家疾如可待。勿急求醫。如此或亦可爲衛生之一助耳。

安波曰。初痛在經。久痛入絡。二語。葉氏實發前人數千年之未發。啓後學於億萬載之無窮。然不獨胃病噎膈之症。渾融使然也。凡病久根深蒂固。綜須治血爲主。此卽古人窮必及腎之意也夫。

### 程杏軒醫案續錄終





3.031  
5  
12(5)2